


孔聖全書


十五



漢書門			
三	二	二	二
二	一	二	二
二	三	六	七
二	四	九	七
冊	架	函	號類

內閣文庫			
三	二	二	漢
七	一	二	書
函	三	六	
一	二	七	
四	冊	號	類

內閣文庫			
番號	漢	2267	
冊數	32 (15)		
函號	287	66	




孔聖全書家語十五卷之

淺草文庫

柳陽何孟春注其王肅所注家語附續各章後

相魯第一



孔子初仕為中都宰制為養生送死之節長幼異食強弱異任

男女別途路無拾遺器不雕偽市不一作無字貳價已上養生之節為四寸

之棺五寸之槨因丘陵為墳不封不聚土以起墳不樹已上送死之節行之

年而西方之諸侯則焉魯國居東故云西方諸侯定公謂孔子曰學子此法

以治魯國何如孔子對曰雖天下可乎何但魯國而已哉於是

二年定公以為司空乃別五土之性而物各得其所生之宜咸

得厥所先時季氏葬周公於墓道之南孔子溝水道而合諸墓焉

謂季桓子曰貶君以彰已罪非禮也今令之所以揜夫子之不
臣由司空為魯大司寇設法而不用無奸民○初魯之販羊有
沈猶氏者常朝飲其羊以詐市人有公慎氏者妻淫不制有慎
潰氏者奢侈踰法魯之鬻六畜者飾之以儲價及孔子之為政
也則沈猶氏不敢朝飲其羊公慎氏出其妻慎潰氏越境而徙
三月則鬻牛馬者不儲價賣羊豚者不加飾男女行者別其塗
道不拾遺男尚忠信女尚貞順四方客至於邑不求有司其職客不求而有司存焉皆如歸焉言如歸家無所之也○定公與齊侯景公名會於
夾谷孔子攝行相事曰臣聞有文事者必有武備有武事者必
有文備古者諸侯並出疆必具官以從請具左右司馬定公從

之至會所為壇位土階三等以遇禮相見會遇之禮禮之簡畧者揖讓而
登獻酢既畢齊使萊人萊夷國今黃縣有萊子城以兵鼓諺孔註切插劫定
公孔子歷階而進以公退曰士以兵之吾兩君為好裔夷之係
敢以兵亂之非齊君所以命諸侯也裔不謀夏夷不亂華中國有禮
儀之大故曰夏中國有服章之美故曰華俘不于盟兵不偪好於神為不祥於德為
愆左傳作愆義於人為失禮君必不然齊侯心作麾而避之有頃齊
奏宮中之樂俳優侏儒戲於前俳優倡優侏儒短人優雜子女為戲弄者孔子趨進
歷階而上不畫一等曰匹夫熒侮諸侯者罪應誅請左右司馬
速加刑焉於是斬侏儒齊侯懼有慙色將盟齊人加載書曰齊
師出境而不以三百乘從我者有如此盟孔子使茲無還音旋魯大

夫對曰而不返我汶陽之田吾以供命者亦如之是時孔子以公退賤者終

其事要盟不書齊侯將設享禮孔子謂梁丘據景公曰齊魯之故

潔故畧不書吾子何不聞焉事既成矣而又享之是勤執事且犧象不出

門嘉樂不野合享而既具是棄禮也若其不具是用粢稗也用

粢稗君辱棄禮名惡子盍圖之夫享所以昭德也不昭不如其

已乃不果享齊侯歸責其羣臣曰魯以君子道輔其君子獨以

夷狄道教寡人使得罪於是乃歸所侵魯之四邑及汶陽之田

四邑考春秋傳及史記只三邑鄆讙龜陰也今蛇丘縣有讙亭博縣有龜山并鄆皆在汶止

柳陽何孟春曰朱子謂田之來歸於君聖人無預焉果如其

說是春秋自書其功也王氏廉曰不然當時實有此事春秋

惡得不書書之為魯史非自為功也避嫌之事賢者不為况

聖人乎

孔子言於定公曰家解大不藏甲邑無百雉之城維凡二百尺

尺周十一里二十二步二尺公侯之制也今三家過制請皆損之乃使季氏宰仲由

墮三都叔孫名不得意於季氏因費宰公山弗擾一作率費人

以襲魯孔子以公與季孫叔孫孟孫入於費氏之宮登武子季

宿之臺費人攻之及臺側孔子命申句音須樂頎勒士眾下伐

之費人北音遂墮三都之城彊公室弱私家尊君卑臣政化大

行

何孟春曰按論語公山弗擾以費畔名孔子史記在定公九

年孔子未為中都宰前春秋不書者以費叛季氏非叛魯也
 十二年季孫斯仲孫無忌從孔子墮費時豈有費叛如此所
 云事是年孔子既尊用於定公尤見信於季氏三家聽其行
 事如此乃欲舍魯背季而赴費人之仇豈人情哉不狃名孔
 子事無之則已若有之則史記九年為得其實而此所云與
 左傳所載妄矣○又曰按春秋公圍成弗克是成猶未墮也
 居無幾齊饋女樂而孔子行矣使久其位於成必有以處之
 惜哉孔子當時止墮郈費
 二郈成不曾墮得

始誅第二

孔子為魯司寇攝行相事有喜色仲由問曰由聞君子禍至不

懼福至不喜今夫子得位而喜何也孔子曰是言也不曰

樂以貴下人乎於是朝政聽朝七日而誅亂夫少正卯戮

之於兩觀門闕之名兩觀在門兩傍懸之下尹於朝三日門人

聞之趨而進至者不言其意皆一也子貢後至趨而進曰夫少

正卯魯之聞人也今夫子為政而始誅之或者為失乎孔子曰

居吾語汝以其故天下有大惡者五而盜竊不與焉一曰心逆

而險二曰行辟讀如僻而堅三曰言偽而辯四曰記醜而博五曰

順非而澤此五者有一於人則不得免於君子之誅而少正卯

皆兼有之故其居處足以振側鳩反一作撮聚也徒成黨其談說足以飾

壞榮眾其疆禦足以返是獨立此乃人之奸雄者也不可以不

除夫殷湯誅尹諧文王誅潘正周公誅管叔太公誅華士管仲
誅付里乙子產誅鄧析史付一作史何凡此七子皆異世而同誅者
以七子異世而同惡故不可赦也詩曰憂心悄悄愠于羣小小
人成羣斯足憂矣

朱子曰少正卯事論語不載思孟不言雖以左氏春秋內外
傳之誣且駁猶不道也是必齊魯諸儒憤聖人之失職故為
此說以誇其權耳家語所具豈亦荀之所傳者歟又曰左氏
記載當時人物甚悉何故有一人如許勞攘而畧不及之史
中間不足信如此者多矣

○孔子為魯人司寇有父子訟者夫子同狴部禮反獄字也執之三月

不別不辨決其子罪其父請止夫子赦之焉季孫名斯聞之不悅曰司寇

欺余曩告余曰為國家必先以孝余今戮一不孝以教民孝不

亦可乎而又赦之何哉冉有以告孔子夫子喟然嘆曰嗚呼上

失其道而殺其下非禮一作理音岸也不教以孝而聽其獄是殺不辜

也三軍大敗不可斬也獄狂不治不可刑也何者上教之不行

罪不在民故也夫慢令謹誅賊也徵歛無時暴也不試責成

也政無此三者然後刑可即也書云義刑義殺勿庸以即汝心

惟曰未有慎事言必教而後刑也故先王既陳之以道德上先

服之而猶不可從民不尚賢以勸之又不可即廢之又不可而後

以威憚之若是三年而百姓正矣其有邪民不從化者然後待

之以刑則民咸知罪矣詩曰尹氏大師維周之氏秉國之均四方是維天子是毗俾民不迷是以威厲而不試刑錯而不用今之世則不然亂其教繁其刑使民迷惑而陷焉又從而制之是以刑彌繁而邪不勝也三尺之岸而虛車不能登也百仞之山任負車登焉何則陵遲故也數仞之墻而民不踰也有仞之山而豎子馮音憑而遊焉陵遲故也今世之陵遲亦久矣而能使民勿踰乎詩曰周道如砥其直如矢君子所履小人所視眷然顧之潜然出涕詩曰瞻彼日月悠悠我思道之云遠蜀云能來子曰伊稽首不其有來子○孔子為魯大司寇有父子訟者至故刑彌繁而盜不勝也夫三尺之限空車不能登者何哉峻故也

百仞之山重載陟焉何哉陵遲故也陵遲猶坡也今世俗之陵池久矣雖有刑法民能勿踰乎

何孟春曰孔子為司寇時季桓子在位此章季孫則斯是也哀公三年季孫斯卒康子始即位韓詩與說苑俱作康子誤矣

○孔子相魯魯人患其將霸欲敗其正乃選好女子八十人衣以文飾而舞容璣舞曲名也文馬四十以遺魯君陳女樂列文馬于魯城南高門高門城門名外季桓子微服往觀之再三將受焉乃語魯君為周道遊往觀終日周倫道路遊行因出觀怠於政事子路言於孔子曰夫子可以行矣孔子曰魯今且郊祭天若致膳於

大夫是則未廢其常禮常吾猶可以止也桓子既受女樂君臣淫
 荒三日不聽國政郊又不致膳俎於大夫孔子遂行宿于屯魯在
 南而師已送曰夫子則非罪孔子曰吾歌可夫歌曰彼婦之口
 可以出走彼婦之謁可以死敗蓋優哉游哉維以卒歲師已反
 桓子曰孔子亦何言師已以實告桓子喟然嘆曰夫子罪我以
 羣婢故也夫

王言解第二

孔子閒居曾參所今切侍孔子曰參乎今之君子唯士與大夫之
 言聞也唯此之言是聞至于君子之言者希於乎吾以王言之以王者之道言之
 之其不出戶牖而化天下曾子起下席而對曰敢問何謂王者

言孔子不應曾子曰侍夫子之間也難對是以敢問孔子又不
 應曾子肅然而懼搢衣而退負席而立有頃孔子顧謂曰參汝
 可語明王之道與曾子曰非敢以為足也請因所聞而學焉子
 曰居吾語汝夫道者所以明德也德者所以尊道也是以非道
 德不尊非道德不明雖有國之良馬不以其道服乘之不可以
 道里雖有博地衆民不以其道治之不可以致霸王是故昔者
 明王內脩七教外行三至七教脩然後可以守守國守天下三至行
 然後可以征其守也則必折衝千里之外其征則必還師衽席
 之上故曰內脩七教而上不勞外行三至而財不費此之謂明
 王之道也曾子曰不勞不費之謂明王可得聞乎孔子曰昔者

帝舜左禹而右皋陶不下席而天下治夫如此何上之勞乎政之不中君之患也令之不行臣之罪也若乃什一而稅用民之力歲不過三日入山澤以其時而無征關譏市廛皆不收賦此則生財之路而明王節之何財之費乎曾子曰敢問何謂七教孔子曰上敬老則下益孝上尊齒則下益悌上樂施則下益寬上親賢則下擇友上好德則下不隱上惡貪則下耻爭上廉讓則下耻節此之謂七教七教者治民之本也七者脩則四海無刑民矣上之親下也如手足之於腹心則下之親上也如幼子之於慈母矣上下相親如此故令則從施則行民懷其德近者悅遠者來附政之效也曾子曰敢問何謂三至孔子曰至礼不

讓而天下治至賞不費而天下之士悅至樂無聲而天下之民和明王篤行三至故天下之君可得而知天下之士可得而臣天下之民可得而用曾子曰敢問此義何謂也孔子曰古者明王必盡知天下良士之名既知其名又知其實然後用天下之爵以尊之此之謂至禮不讓而天下治因天下之祿以富天下之士此之謂至賞不費而天下之士悅如此則天下名譽興焉此之謂至樂無聲而天下之民和曾子曰大哉明王之道非唐虞三代之盛其曷能如是乎參不足以知之○孔子閒居至七教者治民之本也政教定則本正也凡上者民之表也表正則何物不正是故人君先立仁於已然後大夫忠而士信民敦俗

璞璞慤男慤而女貞六者教之致也布諸天下四方而不怨納
 諸尋常之室而不塞等之以禮立之以義行之以順則民之棄
 惡如湯之灌雪焉曾子曰道則至矣弟子不足以明之孔子曰
 參以為姑止乎又有焉昔者明王之治民也法必裂地以封之
 分屬以理之然後賢民無所隱暴民無所伏使有司日省而時
 考之進用賢良退不肖然則賢者悅而不肖者懼哀鰥寡養
 孤獨恤貧窮誘孝悌選才能此七者脩則四海之內無刑民矣
 上之親下也如手足之於腹心下之親上也如幼子之於慈母
 矣上下相親如此故令則從施則行民懷其德近者悅服遠者
 來附政之致也夫布指知寸布手知尺舒肘知尋斯不遠之則

也周制三百步為里千步為井三井而埒埒二而矩此說理數

井非自方里之名疑此誤五十里而都封百里而有國乃為福積資求焉恤

行者有亾是以蠻夷諸夏雖衣冠不同言語不合莫不來賓故

曰無市而民不乏無刑而民不亂田獵掩草網弋射非以盈宮室

也徵斂百姓非以盈府庫也慘怛以補不足禮節以損有餘多

信而寡貌其禮可守其言可覆其迹可履如饑而食如渴而飲

民之信之如寒暑之必驗故視遠若邇非道邇也見明德也是

故兵革不動而威用利不施而親萬民懷其惠此之謂明王之

守折衝千里之外者也曾子曰敢問何謂三至至可得而用曾

子曰敢謂此義何謂孔子曰古者明王必盡知天下良士之名



既知其名又知其實又知其數及其所在焉然後因天下之爵以尊之此之謂至禮不讓而天下治因天下之祿以富天下之士此之謂至賞不費而天下之士悅如此則天下之民名譽興焉此之謂至樂無聲而天下之民和故曰所謂天下之至仁者能合天下之至親也所謂天下之至明者能舉天下之至賢者也此三者咸通然後可以征是故仁者莫大乎愛人智者莫大乎知賢仁政者莫大乎官能有土之君修此三者則四海之內供命而已夫明王之所征必道之所廢者是故誅其君而改其政吊其民而不奪其財故明王之政猶時雨之降仁至則民悅矣是行施彌博得祝彌衆此之謂還師衽席之上

言安安而無憂也

本云明王之道其守也則必折衝千里之外其征也則必還師衽席之上

大昏解第四

孔子侍坐於哀公名曰敢問人道誰為大孔子愀然作色而對曰君之及此言也百姓之惠也固如固固臣敢無辭而對人道政為大公曰敢問何謂為政孔子對曰政者正也君為正則百姓從而正矣君之所為百姓之所從也君不為正百姓何從公曰敢問為政如之何孔子對曰夫婦別父子親君臣信三者正則廢物從之公曰寡人雖無能也願知所以行三者之道可得聞乎孔子對曰古之為政愛人為大所以治愛人禮為大所以治禮敬為大敬之至矣大婚為大大婚既至冕而親迎

也者親之也親之也者敬之至也是故君子以敬為親舍親則

是遺親也弗愛不親弗敬不正一作弗親弗敬弗尊也愛與敬其政之本

與公曰寡人願有言然句冕而親迎不已重乎孔子愀然作色

而對曰合二姓之好以繼先聖之後以為天地宗廟社稷之主

此自天子諸侯言之也君何謂已重乎公曰寡人實固不固焉

為之主者以后夫人言得聞此言也寡人欲問而不得其辭一作寡人欲問不能為辭請少進孔子

曰天地不合萬物不生大婚萬世之嗣也何謂已重焉昔三代

明王之政必敬妻子也盖有道焉妻也者親之正也敢不敬與

子也者親之後也敢不敬與君子無不敬也敬身為大身也者

親之枝也敢不敬與不能敬其身是傷其親傷其親是傷其本

傷其本枝從而亾三者百姓之象也身以及身子以及子妃以

及妃君行此三者則大化愾猶也乎天下矣大至之道也如此

則國家順矣以上見禮記哀公問大同小異孔衍所謂近世小儒在禮記者則便除家語之本篇是也後同此

○孔子侍坐於哀公至萬世之嗣也君何謂已重焉孔子遂言

曰內以治宗廟之禮足以配天地之神出以治直言之禮以立

上下之敬物耻則足以振之國耻足以興之故為政先乎禮禮

其政之本與孔子遂言曰昔三代明王必敬妻子也盖有道焉

妻也者親之主也子也者親之後也敢不敬與是故君子無不

敬敬也者敬身為大身也者親之枝也敢不敬與不敬其身是

傷其親傷其親是傷本也傷其本則枝從而亾三者百姓之

傷其親傷其親是傷本也傷其本則枝從而亾三者百姓之

象也身以及身子以及子妃以及妃君修此三者則大化熾乎

天下矣昔太王之道也太王出亦姜女入亦姜女國無鰥民愛其身以及人之身愛其子以及人之子

故曰太如此國家順矣公曰敢問何謂敬身孔子對曰君子過

言則民作辭過行則民作則言不過辭動不過則百姓恭敬以

從命若是則可謂能敬其身則能成其親矣公曰何謂成其親

孔子對曰君子者也人之成名也百姓與名謂之君子則是成

其親為君子也孔子遂言曰愛政而不能愛人則不能成其身

不能成其身則不能安其土不能安其土則不能樂天公曰敢

問何能成身孔子對曰夫其行已不過乎物謂之成身不過合

乎天道也公曰君子何貴乎天道也孔子曰貴其不已也如日

月東西相從而不已也是天道也不閉而能久是天道也無物

而物成是天道也已成而明之是天道也公曰寡人且愚冥幸

煩子之於心孔子蹴然避席而對曰仁人不過乎物孝子不過

乎親是故仁人之事親也如事天事天如事親此謂孝子成身

公曰寡人既聞如此言無如後罪何孔子對曰君子及此言是

臣之福也

儒行解第五

孔子在衛冉求言於季孫康子曰國有聖人而不能用欲以求

治是猶却步而欲求及前不可得也今孔子在衛衛將用之

已有才而以資鄰國難以言智也請以重幣迎之季孫以告哀

公公從之孔子既至舍哀公館焉公自阼階東孔子賓階西升

堂立侍公曰夫子之服其儒服與孔子對曰丘少居魯衣逢掖

之衣逢猶大也肘掖之處裁制寬大大袂袪也長居宋冠章甫之冠章甫緇布冠也章明也所以表明大夫也丘聞之君子之學也博其服以鄉立未知其為儒服

也公曰敢問儒行孔子對曰略言之則不能終其物悉數之則

留僕未可以對哀公命席孔子待坐曰儒有席上之珍以待聘

夙夜強學以待問懷忠信以待舉力行以待取其自立有如此

者儒有不寶金玉而忠信以為寶不求土地而仁義以為土地

不求多積多文以為富難得而易祿也易祿而難畜也非時不

見不亦難得乎非義不合不亦難畜乎先勞而後祿不亦易祿

乎

近人情有如此者儒有可親而不可劫也可近而不可迫

也可殺而不可辱也其居處不淫其飲食不溇厚其過失可微

辨而不可面數也此一句尚氣好勝先儒請于義理有未全其剛毅有如此者儒有

忠信以為甲冑禮義以為干櫓戴仁而行抱義而處雖有暴政

不更其所其自守有如此者儒有博學而不窮篤行而不倦幽

居而不淫上通而不困禮必以和優游以法慕賢而容衆毀方

而瓦合其寬裕有如此者儒有內稱不辟親外舉不辟怨程功

積事不求厚祿推賢而進達之一作推賢達能不望其報君得其志民

賴其德苟利國家不求富貴其舉賢援能有如此者儒有澡身

浴德陳言而伏靜而正之上不知也默一作鹿而翹之又急為

子聖全書
卷之三
三
也不臨深以為高不加少以為多世治不輕世亂不沮同已不與異已不非其特立獨行有如此者禮記儒行十有七條家語止載七條○孔子在衛至故曰儒今人之名儒也妄常以儒相詬疾諾哀公既得聞此言也言加信行加敬曰終歿吾身弗敢復以儒為戲矣一本孔子對哀公曰儒之自立有容貌之美儒之豫備有近人之德儒之特立有剛毅之存儒之不更無患失之心儒之憂思有寬容之量儒之舉賢有任重之公儒之澡身有規為之大儒之交友有尊讓之全溫良仁之本敬慎仁之地寬裕仁之作遂接仁之能禮節仁之貌言談仁之文歌樂仁之和分散仁之施儒皆兼此而有之哀公聞此言不敢以儒為戲

此篇程子以為非孔子之言安定胡氏謂游夏門人所為其文章與荀卿相類

問禮第六

哀公問於孔子曰大禮何如君子之言禮何其尊也孔子曰丘也鄙人不足以知大禮也公曰否吾子言之孔子曰丘聞之民之所以生者禮為大非禮則無以節事天地之神焉非禮則無以辨君臣上下長幼之位焉非禮則無以別男女父子兄弟昏姻親族疏數音之交焉是故君子此為之尊敬然後以其所能教順百姓夫禮初也始於飲食太古之時燔黍擘豚汙罇杯飲掘地為坎盛水而以手掬飲也黃梓土鼓猶可以致敬鬼神及其死也升屋而

號告曰高其復然後飲腥苴熟形體則降魂氣則上是謂天望而地藏也故生者南嚮死者北首皆從其初也昔之王者未有宮室冬則居營窟夏則居橧巢未有火化食草木之實鳥獸之肉飲其血茹其毛未有絲麻衣其羽皮後聖人有作然後修火之利範金合土以為臺榭宮室戶牖以炮以燔以烹以炙以為醴酪治其麻絲以為布帛以養生送死以事鬼神與其先祖以正君臣以篤父子以睦兄弟以齊上下夫婦此禮之大成也此

且已禮運篇但記則孔子告言偃家語則云告哀公 ○哀公問於孔子曰大禮何如子之言禮何其尊也至教順百姓不廢其會節既有成事而後治其文章黼黻以別尊卑上下之等其順之也而後言其喪祭之紀

宗廟之序品其犧牲設其豕腊修其歲時以敬其祭祀列其親疎序其昭穆而後宗族會醮即安其居以綴恩義卑其宮室節其服御車不雕璣器不彤鏤食不二味心不淫志以與萬民同利古之明王行禮也如此公曰今之君子胡莫之行也孔子對曰今之君子好利無厭淫行不倦荒怠慢遊固民是盡以遂其心以怨其政忤其衆以伐有道求得當欲不以其所虐殺刑誅不以其治夫昔之用民者由前用上前言今之用民者由後用下言是即今之君子莫能為禮也言偃問曰夫子之極言禮也至敬以慈告是謂大祥此禮之大成也此段同禮記禮運不重錄

五儀解第七

哀公問於孔子曰寡人欲論魯國之士與之為治敢問如之何
取之孔子曰生今之世志古之道居今之俗服古之服舍此而
為非者不亦鮮乎哀公曰然則章甫絢也屨紳帶摺同笏者此
賢乎孔子曰不必然丘之所言非此之謂也夫端衣玄裳纒而
乘路一作乘軒者則志不在于食菹一作煮斬衰營屨杖而啜粥者則
志不在于酒肉生今之世志古之道居今之俗服古之服謂此
類也今此而為非者雖有不亦鮮乎哀公曰善蓋此而已乎孔
子曰人有五儀也有庸人有士人有君子有賢人有聖人審此
五者則治道畢矣公曰敢問何謂庸人孔子對曰所謂庸人者
心不存慎終之規口不吐訓格之言不擇賢以託其身不力行

以自定見小闇大而不知所務從物如流不知所執五鑿竅也
鼻口及心之竅也耳欲声目欲色鼻欲臭口欲味心從外物所誘而壞矣為正心從而壞此則庸人
也公曰善何謂士人孔子對曰所謂士人者心有所定計有所
守雖不能盡道術之本必有率也雖不能備百善之美必有處
也是故知不務多務一作必審其所知言不務多務一作必審其所
謂行不務多務一作必審其所由故智既已知之矣言既已謂之
矣行既已由之矣則若性命肌膚之不可易也故富貴不足以
益也卑一作貧賤不足以損也此則士人也公曰何謂君子孔子
對曰所謂君子者言必忠信而心不怨仁義在身而色無伐思
慮通明而辭不專篤行信道自強不息油然如將可越而終不

可及者此則君子也公曰何謂賢人孔子對曰所謂賢人者德
 不踰閑行中規繩言足以法於天下而不傷於身道足以化於
 百姓而不傷于本富則天下無死音苑蘊蓄也財施則天下不病貧
 此則賢者也公曰何謂聖人孔子對曰所謂聖人者德合於天
 地變通無方窮萬物之始終協庶品之自然敷其大道而遂成
 情性明並日月化行若神下民不知其德親者不識其鄰此則
 聖人也公曰善哉非子之賢則寡人不得聞此言也雖然寡人
 生于深宮之中長于婦人之手未嘗知哀知憂知勞知懼知危
 恐不足以行五儀之教若何孔子對曰如君之言已知之矣丘
 亦無所聞焉公曰非吾子寡人無以啓其心吾子言也孔子曰

君入廟門如右登自阼階仰視之桷一作棟俯察機筵其器皆存
 而不覩其人君以此思哀則哀可知矣君昧爽夙興正其衣冠
 乎旦視朝慮其危難一物失禮亂亡之端君以此思憂則憂可
 知矣君日出聽政至于中冥去聲諸侯子孫往來為賓行禮揖讓
 慎其威儀君以此思勞則勞可知矣君緬然長思出于四門周
 章逡型亡國之墟必將有數焉君以此思懼則懼可知矣夫君
 者舟也庶人者水也水所以載舟亦所以覆舟君以此思危則
 危可知矣君既明此五者又少留意於五儀之事則政治何有
 失矣○哀公問於孔子曰至紳帶縉笏者皆賢人也孔子曰不
 必然也至未嘗知哀未嘗知憂未嘗知勞未嘗知懼未嘗知危

恐不足以行五儀之教若何見前不重出○哀公問於孔子曰請問取人之法孔子對曰事任於官無取捷捷無取鉗鉗安對不無取啍啍多捷捷貪也鉗鉗亂也啍啍誕也故弓調而後求勁馬服而後求良馬士必慤而後求智能者焉不慤而多能譬之豺狼不可邇○哀公問於孔子曰吾聞君子不博有之乎孔子曰有之公曰何為對曰為其二乘公曰有二乘則何為不博子曰為其兼行惡道也此具博三哀公懼焉有問復問曰若是乎君之惡惡道至甚也孔子曰君子之惡惡道不甚則好善道亦不甚好善道不甚則百姓之親上亦不甚詩云未見君子之心愷愷亦既見上下既覲止我心則悅說之好善道也如此公曰

矣哉夫君子成人之善不成人之惡微吾子言焉吾弗之聞也○哀公問於孔子曰夫國家之存亡禍福信有天命非唯人也孔子對曰存亡禍福皆已而已天災地妖不能加也公曰善吾子之言豈有其事乎孔子曰昔者殷王帝辛之世帝辛有雀生大鳥於城隅焉占之曰凡以小生大則國家必王而名必昌於是帝辛介雀之德不修國政亢暴無極朝臣莫救外寇乃至殷國以亡此即已逆天時詭福反為禍者也又其先世殷王太戊之時道缺法圯以致天孽桑穀于朝七日大拱占之者曰桑穀野木而不合生朝意者國亡乎太戊恐駭側身修行思先王之政明養民之道三年之後遠方慕義重譯至者十有六國此即

卷之三

以已逆天時詭禍為福者也故天災地妖所以傲人主者也
象徵惟所以傲人臣者也災妖不勝善政寤夢不勝善行能知
此者至治之極也唯門主達此公曰寡人不鄙固此亦不得聞
君子之教也○哀公問於孔子曰智者壽乎仁者壽乎孔子對
曰然人有三死而非其命也行已自取也夫寢處不時飲食不
節逸勞過度者疾其殺之居下位而上干其君嗜慾無厭而求
不止者刑其殺之以化犯衆以弱侮強忿怒不類動不量力者
兵共殺之此三者死非命也人自取之若夫智士仁人將身有
節動靜以義喜怒以時無害其性雖得壽焉不亦可乎○哀公
問於孔子曰寡人欲吾國小而能守大則攻其道如何孔子曰

曰臣君朝廷有禮上下相親天下百姓皆君之民將誰攻之苟
遠此道民畔如歸皆君之讐也將誰與守公曰善哉於是廢山
澤之禁弛關市之稅以惠百姓

何孟春曰哀公感夫子之言求所以親民之道遂乃廢禁弛
稅以惠百姓亦可謂善聽言者然終不能久也

致思第八

孔子北遊登於農山之上山在魯地一作戎山子路子貢顏淵侍側孔子

四望喟然而嘆曰登高望下使人心悲於是致思無所不至矣
二三人各言爾志吾將擇焉子路進曰由願得赤羽若日白羽
若月鐘鼓之聲上震于天旌一作旗續紵下蟠於地由當一隊

而敵之必也攘地千里擐旗執戟唯由能之使夫二子從我焉
 夫子曰勇哉士乎憤憤者乎子貢進曰賜願使齊楚合戰於濟
模切 之野兩壘相當旌旗相望塵埃相接挺刃交兵
切 養余掌切 尚編素 賜着縞衣白冠兵凶事故 陳說其間推論利害釋二國之患唯
 賜能之使夫二子從我焉夫子曰辯哉士乎僂僂者乎顏回退
 而不言孔子曰回來汝奚獨無願乎回對曰文武之事二子已
 言之回何敢與焉孔子曰若鄙心不與焉第言之對曰回聞董
 猶不同器而藏堯桀不共國而治以其類異也回願得明王聖
 主而輔相之敷其五教導之以禮樂使民城郭不修溝池不越
不深 鑄劍戟以為農器放牛馬于原藪室家無離曠之恩千歲

無戰鬪之患如此則由無所施其勇而賜無所用其辯矣夫子
 凜然曰美哉德乎姚姚者乎子路抗手而問曰夫子何選擇也焉
 孔子曰不傷財不害民不繁詞則顏氏之子有之矣○孔子北
 遊於農山至文武之事則二子者既言之矣回何云焉孔子曰
 雖然各言爾志也小子言之對曰回聞云云不重 ○季羔為衛
 之士師別人之足俄而衛有崩曠之亂季羔逃之走郭門別者
 守門焉謂季羔曰於彼有缺季羔曰君子不踰又曰於彼有竇
 季羔曰君子不隧缺竇非正路君子不踰 又曰於此有室季羔
 乃入焉既而追者罷季羔將去謂別者曰吾不能虧主之法而
 親別子之足矣今吾在難正子報怨之時而逃我者三何哉剛

者曰斷足固我之罪昔公之治臣也傾側法令先後臣以法欲
 臣之免於法也臣知之獄決罪定臨當論刑君愀然不悅見於
 顏色臣又知之君豈私臣哉天生君子其道固然此臣之所以
 悅君也孔子聞之曰善哉為吏其用法一也思仁恕則樹德加
 嚴暴則樹怨公以行之其子羔乎○季羔為衛之士師至斷足
 固我之罪無可奈何曩者君治臣以法令先人後臣欲臣之免
 也臣知獄決罪定臨當論刑君愀然不樂云云 同前

何孟春曰按此在魯聞之之言也韓非子載子臯事謂其時
 孔子相衛有惡孔子于衛君者曰尼欲作亂孔子走弟子皆
 逃子臯從門出此安也孔子以哀公十一年自衛反魯至是

六年矣其夏孔子卒

○孔子曰文王似元年武王似春王周公似正月文王以王季
 為父以太任為母以太姒為妃以武王周公為子以泰顛閔天
 為臣其本美矣武王正其身以正其國正其國以正天下伐無
 道刑有罪一動而天下正其事正矣春致其時而萬物皆及生
 君致其道而萬人皆及治周公載已而天下順之其誠至矣○
 孔子曰王者有似乎春秋正其本而萬物皆生文王以王季為父至周公
 載已行化載亦行也言行已以行化其身正不令而行也而天下順之其誠至矣
 ○子路為蒲邑宰為水備與其民脩溝澗以民之勞煩苦也人
 與之一簞食音一壺漿孔子聞之使子貢止之子路忿然不悅

往見孔子曰由也以暴雨將至恐有水災故與民脩溝洫以備之而民多匱於食一作民多是以簞食壺漿而與之夫子使賜止之何也是夫子止由之行仁也夫子以仁教人而禁其行仁也由也不受孔子曰汝以民為餓也何不白于君發倉廩以賑之而以爾私餽之是汝明君之無惠而見已之德也速已則可否則汝之受罪不久矣子路心服而退也○子路為蒲宰為水備至而見已之德美矣汝速已則可不則汝之見罪必矣

○子路見於孔子曰負重涉遠不擇地而休家貧親老不擇祿而仕昔者由也事二親之時常食藜藿藜藿之實為親負米百里之外親沒之後南遊於楚從車百乘積粟萬鍾釜十鍾累網而

坐列鼎而食雖飲食藜藿為親負米不可復得也枯魚銜索幾何不蠹二親之壽忽若過隙孔子曰由也事親可謂生事盡力死事盡思者也

○子路治蒲請見於夫子曰由願受教于夫子子曰蒲其如何對曰邑多壯士又難治也子曰然吾語爾恭而敬可以攝勇寬而正可以懷疆愛而恕可以容困溫而斷可以抑奸如此加之則政不難矣○魯有儉嗇者瓦鬲煮食食之自謂其美盛之土型之器以進孔子孔子受之歡然而悅如受大牢牛羊之饋子路曰瓦甌陋器也煮食薄膳也夫子何喜之如此乎子曰夫好諫者思其君食美者念其親吾非以饌具之為厚以其食厚而

我思焉。○孔子之楚而有漁者獻魚焉。孔子不受。漁者曰：「天暑市遠，何所嚮也？」思慮棄之，糞壤不如獻之。君子故敢以進焉。於是夫子再拜受之，使弟子掃地，將以享祭。門人曰：「將以棄之而夫子以祭之，何也？」孔子曰：「吾聞諸惜其腐餼而欲以務施者，仁人之偶也。惡有受仁人之饋而無祭者乎？」○孔子自季孫之賜我粟千鍾也，而友益親。得季孫千鍾之粟，以自南宮敬叔之乘我車也。而道加行。孔子欲見老聃而西，觀周敬叔言於魯君，終還弟子四方來習。故道雖貴，必有時而後重，有勢而後行。微夫二子之貶財，則丘之道殆將廢矣。

○子路問於孔子曰：「管仲之為人，何如？」子曰：「仁也。」子路曰：「昔管仲說襄公，公不受，是不辯也；欲立公子糾而不能，是不智也；家殘於齊而無憂色，是不慈也；桎梏而居檻車，無慙心，是無醜也；事所射之君，是不貞也；召忽死之，管仲不死，是不忠也；仁人之道固若是乎？」孔子曰：「管仲說襄公，襄公不受，公之闇也；欲立子糾而不能，不遇時也；家殘於齊而無憂色，是知權命也；桎梏而無慙心，自裁審也；事所射之君，通於變也；不死，子糾量輕重也；夫子糾未成君，管仲未成臣，管仲才度義，管仲不死，束縛而立功名，未可非也；召忽雖死，過與取仁，未足多也。」○孔子適齊，中路聞哭者之聲，其音甚哀，孔子謂其僕曰：「此哭哀則哀矣，然非喪者之哀矣。」驅而前，少進，見異人焉，擁鎌帶素，哭者不哀。孔子

仲說襄公，公不受，是不辯也；欲立公子糾而不能，是不智也；家殘於齊而無憂色，是不慈也；桎梏而居檻車，無慙心，是無醜也；事所射之君，是不貞也；召忽死之，管仲不死，是不忠也；仁人之道固若是乎？孔子曰：管仲說襄公，襄公不受，公之闇也；欲立子糾而不能，不遇時也；家殘於齊而無憂色，是知權命也；桎梏而無慙心，自裁審也；事所射之君，通於變也；不死，子糾量輕重也；夫子糾未成君，管仲未成臣，管仲才度義，管仲不死，束縛而立功名，未可非也；召忽雖死，過與取仁，未足多也。○孔子適齊，中路聞哭者之聲，其音甚哀，孔子謂其僕曰：此哭哀則哀矣，然非喪者之哀矣。驅而前，少進，見異人焉，擁鎌帶素，哭者不哀。孔子

下車追而問曰子何人也對曰吾丘吾子也曰子今非喪之所
奚哭之悲也丘吾子曰吾有三失晚而自覺悔之何及曰三失
可得聞乎願子告吾無隱也丘吾子曰吾少時好學周遍天下
後還喪吾親是一失也長事齊君君驕奢失士臣節不遂是二
失也吾平生厚交而今皆離絕是三失也夫樹欲靜而風不停
子欲養而親不待往而不來者年也不可再見者親也請從此
辭遂投水而死孔子曰小子識之斯足為戒矣自是弟子辭歸
養親者十有三○孔子謂伯魚曰鯉乎吾聞可以與人終日不
倦者其唯學焉其容體不足觀也其勇力不足憚也其先祖不
足稱也其族姓不足道也終而有大名以顯聞四方流聲後裔

者豈非學之效也故君子不可以不學其容其不可以不飭不

飭無類類宜為親不在無類失親禮貌矜莊然失親不忠情不

則無誠不忠失禮禮以忠失禮不立非禮則夫遠而有光者飭也

近而愈明者學也譬之汗池水潦注焉萑葦生焉雖或以觀之

孰知其源乎水潦注於池而生萑葦觀者誰知非源泉乎以言

乎○孔子之郊少昊之後郊子達遭程子於塗傾蓋車而語終

日甚相親也顧謂子路曰取束帛以贈先生子路屑然對曰由

聞之士不中間中間謂見女嫁無媒君子不以交禮也有聞必

顧謂子路子路又對如初孔子曰由詩不云乎有美一人清揚

宛兮邂逅相遇適我願兮今程子天下賢士也於斯不贈則終

身弗能見也小子行之○孔子自衛反魯息駕于河梁而觀焉

河水無梁莊周書說孔子于河梁言事者通渭水為河也有懸水三十仞八尺曰仞懸

迴流也水九十里魚鱉不能導龜鼃不能居有一丈夫方將厲

度之孔子使人並涯止之曰此懸水三十仞圜流九十里魚鱉

龜鼃不能居也意者難可濟也丈夫不以措意遂度而出孔子

問之曰子乎有道術乎所以能入而出者何也丈夫對曰始吾

之入也先以忠信及吾之出也又從以忠信忠信措吾軀于波

流而吾不敢以用私所以能入而復出也孔子謂弟子曰二三

子識之水且猶可以忠信成身親之而况於人乎○孔子將行

雨而無蓋門人曰商也有之孔子曰商之為人也甚恡于財吾

聞與人交推其長者違其短者故能久也○子貢問於孔子曰

死者有知乎將無知乎子曰吾欲言死之有知將恐孝子順孫

妨生以送死吾欲言死之無知將恐不孝之子棄其親而不葬

賜欲知死者有知與無知非今之急後自知之○子貢問治民

於孔子子曰懍懍焉若持腐索之扞馬突子貢曰何其畏也孔

子曰夫通達御皆人也以道導之則吾畜也不以道導之則吾

讐也如之何其無畏也○魯國之法贖人臣妾于諸侯者皆取

金於府子貢贖之辭而不取金孔子聞之曰賜失之矣夫聖人

之舉事也可以移風易俗而教導可以施之於百姓非獨適身

之行也今魯國富者寡而貧者衆贖人受金則為不廉則何以

相贖乎自今以後魯人不復贖人於諸侯

三恕第九

孔子曰君子有三恕有君不能事有臣而求其使非恕也有親不能孝有子而求其報非恕也有兄不能敬有弟而求其順非恕也士能明于三恕之本則可以端身矣

○孔子曰君子有三思而不可不察也少而不學長無能也老而不教死無思也一作死莫之思也有而不施貧無與也一作窮莫是

故君子少思其長則務學老思其死則務教有思其窮則務施○曾子曰入國是也言信於群臣而望可也行忠於鄉大夫則仕可也澤施於百姓則富可也孔子曰參之言此可謂善安身

矣

○孔子觀於魯桓公之廟有欹器焉問於守廟者曰此謂何器

對曰此蓋為宥坐之器宥與右同言可置於坐右也或曰宥與

之器名孔子曰吾聞宥坐之器虛則欹中則正滿則覆明君以

為至誠故常置之於坐側孔子顧謂諸弟子曰試注水焉乃注

之水中則正滿則覆夫子喟然嘆曰嗚呼夫物惡有滿而不覆

者哉子路進曰敢問持滿有道乎孔子曰持滿之道挹而損之

子路曰損之有道乎孔子曰聰明睿智守之以愚功被天下守

之以讓一作勇力振世守之以怯富有四海守之以謙此所謂

損之又損之之道也○伯常騫問於孔子曰騫固周國之賤吏

也。不自以不肖，將北面以事君子，敢問正道宜行，不容于世，隱道宜行，然亦不忍。今欲身亦不窮，道亦不隱，為之有道乎？孔子曰：善哉！子之問也。自丘之聞，未有若吾子所問，辯且說也。丘嘗聞君子之言道矣，聽者無察，則道不入；奇偉不稽，則道不信；又嘗聞君子之言事矣，制無度量，則事不成；其政曉察，則民不保也。又嘗聞君子之言志矣，剛折者不終，徑易者則數傷。洗倨者則不親，荒利者則無不弊。又嘗聞養世之君子矣，從輕勿為先，從重勿為後，見像以法而勿強，見法而已，不陳道而勿怫道而已，不與世相違也。此四者，丘之所聞也。

○孔子觀於東流之水，子貢問曰：君子所見大水，必觀焉，何也？

孔子曰：以其不息，且遍與諸生而不為也。物必得水而後生，水不與生而又不德也。夫水似乎德，其流也則卑下，倨邑必脩其理，似義。浩浩乎無屈盡之期，此似道。流行赴百仞之嶮，而不懼，此似勇。至量必平之，此似法。盛而不求概，此似正。綽約微達，此似察。發源必東，此似志。以出以入，萬物就以化絜，此似善化也。水之德有若此，是故君子見必觀焉。○子貢觀于魯廟之北堂，出而聞于孔子曰：向也賜觀于太廟之堂，未既，輟還瞻北，蓋皆斷焉。彼將有說，取匠過之也。孔子曰：太廟之堂，宮致良工之匠，匠致良材，盡其功巧，蓋貴父矣。尚也有說也。

○孔子曰：吾有所耻，有所鄙，有所殆。夫幼而不能強學，老而無

以教吾耻之去其鄉事君而達卒遇故人曾無舊言吾鄙之與
小人處而不能親賢吾殆之

○子路見於孔子孔子曰智者若何仁者若何子路對曰智者
使人知已仁者使人愛已子曰可謂士矣子路出子貢入問亦
如之子貢對曰智者知人仁者愛人子曰可謂士矣子貢出顏
回入問亦如之對曰智者自知仁者自愛子曰可謂士君子矣
○魯哀公問于孔子曰子從父命命存乎臣從君命命存乎三問孔
子不對孔子趨出以語子貢曰鄉向者君問丘曰子從父命孝
乎臣從君命貞乎三問而丘不對賜以為何如子貢曰子從父
命孝矣臣從君命貞矣奚疑焉孔子曰小人哉賜不識也昔者

明王萬乘之國有爭臣七人則主無過舉千乘之國有爭臣五
人則社稷不危百乘之家有爭臣三人則祿位不替父有爭子
不陷無禮士有爭友不行不義故子從父命奚詎為孝臣從君
命奚詎為貞夫能密其所從之謂孝之謂貞矣審其可從則不從

可從不從則非臣子不可從而從陷君父○子貢問于孔子曰

子從父命孝乎至孔子曰鄙哉賜汝不識也云同前

○子路盛服見于孔子子曰由是僂僂者何也夫江始出于岷
山其源可以濫觴及其至于江津不舫舟不避風則不可以涉
非唯下流水多耶今爾衣服既盛顏色充盈天下且孰肯以非
告汝乎子路趨而出改服而入蓋自若也子曰由志之吾告汝

奮于言者華奮于行者伐夫色智而有能者小人也故君子知之曰知言之要也不能曰不能行之至也言要則智行至則仁既仁且智惡不足哉

○子路問於孔子曰有人于此披褐而懷玉何如子曰國無道隱之可也國有道則袞冕而執王

好生第十

魯哀公問于孔子曰昔者舜冠何冠乎孔子不對公曰寡人有問于子而子無言何也對曰以君之問不先其大者故方思所以為對公曰其大何乎孔子曰舜之為君也其政好生而惡殺其任授賢而替不肖德蓋八地而靜虛化若四時而變物是以

四海承風暢於異類鳳翔麟至鳥獸馴德無他好生故也君舍此道而冠冕是問是以緩對

○子路戎服見於孔子拔劍而舞之曰古之君子固以劍自衛乎孔子曰古之君子忠以為質仁以為衛不出環堵之室而知千里之外有不善則以忠化之侵暴則以仁固之何待劍乎子路曰由乃今聞此言請攝齊音各以受教矣

楚恭王名審出遊亡鳥鳥號弓名公孫龍子云楚王張繁弱之圃而喪其弓繁弱之弓左右請求之王曰止楚王一作失弓

楚人得之又何求之孔子聞之曰惜乎其不大也亦曰人遺弓人得之而已何必楚也

○虞芮二國

虞在河東大陽果芮在馮翊臨晉縣

爭田而訟連年不決乃相謂曰

吾聞西伯之仁也盍往質之入其境則耕者讓畔行者讓路入

其朝士讓為大夫大夫讓于卿虞芮之君曰嘻吾儕也等小人也

不可以入君子之朝遂自相與而退咸以所爭之田為間田矣

孔子曰以此觀之文王之道其不可加焉不令而從不教而聽

至矣哉○魯人有獨處室者隣之釐髮婦寡婦也亦獨處一室夜

暴風雨至釐婦之室壞趨而託焉魯人閉戶而不納釐婦自牖

與之言曰子何不仁而不納我乎魯人曰吾聞男女不六十不

同居今子幼吾亦幼是以不爾納也婦人曰子何不如柳下惠

然嫗不建門之女國人不稱其亂魯人曰柳下惠則可吾固

不可行將以吾之不可學柳下惠之可孔子聞之曰甚哉欲學

柳下惠者未有似於此者期于至善而不襲其為可謂明智乎○

孔子曰小辯害義小言破道關雎興于鳥而君子美之取其雌

雄之有別鹿鳴興于獸而君子大之取其得食而相呼若以鳥

獸之名嫗之固不可行也

何孟春曰夫詩之託物博矣鳴鳩言均一也羔羊取純潔也

騶虞不嗜殺也鴛鴦在梁得所止也桑扈啄粟失其性也禽

庚陽之候也鳴鵙陰之兆也薰葭霜露變也桃蟲拚飛化也

鶴鳴九臯誠不可揜也鸞飛魚躍道無不在也南有樛木正

女之操也隰有荷華君子之德也匪鱣匪鮪避危難也匪兕

匪虎慨勞疲也。蓼莪常棣知孝友也。繁蘋行葦見忠信也。葛履褊而羔裘忘也。蟋蟀儉而蜉蝣奢也。爰有樹檀其下維穀。美必有惡也。周原膺膺董荼如飴。惡不可為美也。黍以為稷。心眩於事也。蠅以為雞。心惑於聽也。策竹猗猗。文章著也。皎皎白駒。賢人隱也。贈以芍藥。賄我握椒。芳香之辱也。馬得護草。言采其蠹。憂思之深也。柞棘斯拔。侯新侯蒸。盛衰之義也。鳳凰於飛。雉離于羅。治亂之符也。相鼠碩鼠。疾惡也。采芣采芣。傷讒也。引而伸之。觸類而長之。莫不有道義之可稱焉。夫子獨舉關雎。鹿鳴而言。即風雅之首篇。以槩其餘耳。世有微一事。察一辭。審一枝也。可曲說而不可廣應也。君子惡之。

○孔子讀史至楚復陳

陳夏徵舒殺其君楚莊王討之因陳取之而申叔時諫莊王從之還復陳

然嘆曰賢哉楚王輕千乘之國而重一言之信。匪申叔之信不能達其義。匪莊王之賢不能受其訓。

○孔子常目筮其卦得賁焉。愀然有不平之狀。子張進曰。師聞

卜者得賁卦吉也。而夫子之色有不平。何也。孔子曰。以其離也。

在周易山下有火。謂之賁。非正色之卦也。夫質也。黑白宜正焉。

今得賁。非吾兆也。吾聞丹漆不文。白玉不雕。何也。質有餘不受

飾故也。○孔子曰。吾于甘棠見宗廟之敬。其美思其人。必愛其

樹。尊其人。必敬其位道也。

○孔子為魯司寇。斷獄訟。皆進衆議者而問之。曰。子以為奚若。

其以為何君皆曰云云如是然後夫子曰當從某子幾是
○孔子問漆雕憑曰子事臧文仲武仲及孺子容此三大夫孰
賢對曰臧氏家有守龜焉名曰蔡文仲三年而為一兆武仲三
年而為二兆孺子容三年而為三兆憑從此之見若問三人之
賢與不賢所未敢識也孔子曰君子哉漆雕氏之子其言人之
美也隱而顯言人之過也微而著智而不能及明而不能見孰
克如此○魯公索氏將祭而亡其牲孔子聞之曰公索氏不及
二年將亡後一年而亡門人問曰昔公索氏亡其祭牲而夫子
曰不及二年必亡今過期而亡夫子何以知其然孔子曰夫祭
者孝子所以自盡於其親將祭而亡其牲則其餘所亡者多矣
若此而不亡者未之有也

○曾子曰狎甚則相簡莊甚則不親是故君子之狎足以交歡
其莊足以成禮孔子聞斯言也曰二三子志之孰謂參也不知
禮乎○哀公問曰紳委章甫有益乎孔子作色而對曰君
胡然焉衰麻首杖者志不存乎樂非耳弗聞服使然也黼黻衮
冕者容不襲漫非性矜莊服使然也介冑執戈者無退懦之氣
非體純猛服使然也且臣聞之好肆不守折言好市肆不能為廉而長止
者不為市竊夫其有益與無益君子所以知
○孔子謂子路曰見長者而不盡其辭雖有風雨吾不能入其
門矣故君子以其所能敬人小人反是

子聖全書 卷之五 十五卷
○孔子謂子路曰君子以心導耳目立義以為勇小人以耳目導心不慈以為勇故曰退之而不怨先之斯可從已

○孔子曰君子有三患未之聞患不得聞既得聞之患弗得學既得學之患弗能行有其德而無其言君子耻之有其言而無其行君子耻之既得之而又失之君子耻之地有餘民不足君子耻之衆寡均而人功倍已焉君子耻之

○孔子謂子路曰君子而強氣則不得其死小人而強氣則刑戮荐暴幽詩曰殆天之未陰雨徹彼桑土綢繆牖戶今汝下民或敢侮余孔子曰能治國家之如此雖欲侮之豈可得乎周自后稷積行累功以有爵土公劉重之以仁及至大王亶甫敦以

德讓其樹根置本備豫遠矣初大王都幽翟人侵之市之以皮幣不得免焉事之以珠玉不得免焉於是屬耆老而告之所欲吾土地吾聞之君子不以所養而害人二三子何患乎無君漆獨與大姜去之踰梁山邑于岐山之下幽人曰仁人之君不可失也從之如歸市焉天之與周民之去殷久矣若此而不能天下未之有也武庚惡能侮郟詩曰執轡如組兩駟如儼孔子曰為此詩者其知政乎夫為組者摠紕於此成之於彼言其動于近行于遠也執此法以御民豈不化乎竿旄之忠告至矣哉

觀周第十一

孔子謂南宮敬叔曰吾聞老聃博古知今則吾師也今將往矣

敬叔與俱至周問禮于老聃訪樂于萇弘歷郊社之所考明堂
 之則察廟朝之度於是喟然曰吾乃今知周公之聖與周之所
 以上也及去周老子送之曰吾聞富貴者送人以財仁者送人
 以言吾雖不能富貴而竊仁者之號請送子以言乎凡當今之
 士聰明深察而近于死者好譏議人者也博辯閎遠一作宏而危
 其身者好發人之惡者也為人子者毋以有已為人臣者毋以
 有已孔子曰敬奉教自周反魯道彌尊矣遠方弟子之進者蓋
 三千焉○南宮敬叔告于魯君曰今孔子將適周觀先王之遺
 制考禮樂之所極斯大業也君盍以乘資之臣請與往公曰諾
 與孔子車一乘馬二疋堅其侍御敬叔與俱至周至好發人之

惡者也無以有已為人子者無以惡已為人臣者言聽則信不

全行臣孔子曰敬奉教云同前孔子觀乎明堂觀四門墉有

堯舜之容桀紂之象而各有善惡之狀與廢之誠焉淮南子云

得失備覽是非堯舜所以昌桀紂所以亡者皆著于明堂成康

繼文武之業守明堂之制明存亡之跡見成敗之變以此言考

容象者乃文王所為也又有周公相成王抱之負斧扆南面以

朝諸侯之圖焉王應麟曰有周盛時褒賞功德或藏于盟府成

于天下乃繪象于明堂之廟期億萬年無忘師保之德使睹之

者肅然動心願竭忠盡瘁追配前人褒崇勸獎之道于是為至

然則漢唐圖書殿閣孔子徘徊而望之謂從者曰此周之所以

盛也夫明鏡所以察形往古所以知今人主不務襲跡于其所

以安存而忽怠於其所以危亡未有異于郤走而求及前人也

豈不惑哉○孔子觀周入后稷之廟即周太右陛之前有金人

焉鑄金為人參緘其口而銘其背曰古之慎言人也戒之哉戒

之哉無多言多言多敗無多事多事多患安樂必戒無行所悔

勿謂何傷其禍將長勿謂何害其禍將大勿謂何殘其禍將然

勿謂不聞神將伺人熖熖不滅炎炎若何涓涓不壅終為江河

綿綿不絕或成網羅毫末不札將尋斧柯誠能慎之福之根也

口是何傷禍之門也彊梁者不得其死好勝者必遇其敵盜憎

主人民怨其上君子知天下之不可上也故下之知衆人之不

可先也故後之温恭慎德使人慕之執雌持下人莫喻之人皆

趨彼我獨守人皆惑之我獨不徙內藏我智不示人技我雖尊

高高其言誰能了此江海雖左長千百川以其卑也大道無

親親而自下入戒之哉孔子既讀斯文也顧謂弟子曰小子識春

之此言實而中情而信

○孔子觀周遂入太祖后稷之廟廟堂右階之前有金人焉注

情而信詩曰戰戰兢兢如臨深淵如履薄冰行身如此豈以口

過患哉

并按皇覽記魏文帝時撰集武王問尚父曰五帝之誠可得聞乎尚父

曰黃帝之誠曰吾之居民上也搖搖恐夕不至朝故為金人

三封其口曰古之慎言然則后稷之廟孔子之所見殆即黃

帝所為金人之類歟又按藝文志道家有黃帝銘六篇王應

麟謂金人銘即黃帝六篇之一也

○孔子見老聃而問焉甚矣道之于今難行也吾比執道而今委質以求當世之君而弗受也道于今難行也老子曰夫說者流于辯聽者亂于辭如此二者則道不可以忘也

弟子行第十二

衛將軍文子

記注文子滿平也按左傳乃才芳也彌牟為南氏才芳始為將軍氏皆公子郢之子豈以謚同哉相

與問於子貢曰吾聞孔子之施教也先之以詩書而導之以孝悌說之以仁義觀也之以禮樂然後成之以文德文即詩書禮樂德即孝弟仁義朱子曰古者唯習詩書禮樂如易則掌于太卜春秋則掌于史官孝者無補之蓋升堂入室者七十有餘人其孰為賢子貢對以不知文子曰請問其行去声下同子貢

曰夫能夙興夜寐諷誦崇禮行不貳過稱言不苟是顏回之行也若逢有德之君世受顯命不失厥名在貧如客使其臣如僕不遷怒不深怨不錄舊罪是冉雍之行也不畏彊禦不侮矜同寡其言循性材任治戎是仲由之行也孔子和之以文彊乎武哉文不勝其質恭老卹幼不忘賓旅好學博藝省物而勤也是冉求之行也孔子語之曰好學則知卹孤則惠恭則近禮勤則有繼齊莊而能肅志通而好禮擯相兩君之事篤雅而有節是公西赤之行也孔子曰二三子之欲學賓客之禮者其于赤也滿而不盈實而若虛過之如不及其德敢言于人無所不信其驕人也常以浩浩如彼以其富等句浩浩之氣也是曾參之行也孔子曰夫孝

德之始也第德之序也信德之厚也忠德之正也參行夫四德者也美功不伐貴位不喜不侮不佚不傲無告是顯孫師之行也孔子曰其不伐則猶可能其不弊百姓則仁也夫子以其仁為大學之深送迎必敬上交下接若截焉是卜商之行也貴之不喜賤之不怒苟利于民矣廉于行已是澹臺滅明之行也先成其慮及事而用之故動則不妄是言偃之行也獨居思仁公言仁義其於詩也則一日三復白圭之玷是宮縮之行也孔子信其能仁以為異士自見孔子出人于戶未嘗越履往來過之足不履影啓蟄不殺方長不折執親之喪泣血三年未嘗見齒是高柴之行也凡此諸子賜之所親觀者也吾子有命而訊賜

賜也固不足以知賢○衛將軍文子問於子貢曰吾聞孔子之施教也先之以詩書而道之以孝悌說之以仁義觀之以禮樂然後成之以文德蓋入室升堂者七十有餘人其孰為賢子貢對以不知文子曰以吾子常與學賢者也不知何謂子貢對曰賢人無妄賢人舉動不妄知賢即難故君子之言曰智莫難于知人是以難對也文子曰若夫知賢莫不難今吾子親遊焉是以敢問子貢曰夫子之門人蓋有三千就焉賜有逮及焉未逮及焉故不得徧知以告也文中曰吾子所及者請問其行子貢對曰夫能夙興夜寐諷誦崇禮行不貳過稱言不苟是顏回之行也孔子說之以詩曰媚茲一人應侯慎德永言孝思孝思維則若逢

有德之君世受顯命不失厥名以御于天子則王者之相也在
貧如客使其臣如借不遷怒不深怨不錄舊罪是冉雍之行也

孔子論其材曰有土之君子也有衆使也有刑用也然後稱怒

焉有土之君有衆足使有刑足用然後可以稱怒冉雍非有土之君故使其臣如借使之而不加怒也孔子告之

以詩曰靡不有初鮮克有終匹夫不怒唯以亡其身不畏強禦

不侮矜寡其言循性其都以富仲由長材任治戎是仲由之行于富貴材任治戎是仲由之行

也孔子和之以文說之以詩曰受小拱大拱為下國駮罷荷天

子之龍孔子曰和仲由以文不難不悚敷奏其勇強乎武哉文

不勝其質恭老卹幼不忘賓旅好學博藝省物而勤也是冉求

之行也孔子因而語之曰好學則智鄙孤則惠恭則近禮勤則

有繼堯舜篤恭以王天下其稱之也曰宜為國老齊莊而能肅

志通而好禮擯相兩君之事篤雅有節是公西赤之行也子曰

禮經三百可勉能也威儀三千則難也公西赤問曰何謂也子

曰貌以儼禮禮以儼辭是謂難焉衆人聞之以為成也孔子語

人當賓客之事則達矣謂門人曰二三子之欲學賓客之禮者

其于赤也滿而不盈實而如虛過之如不及堯王難之博無不

學其貌恭其德敦其言於人也無所不信其驕于人也常以浩

浩是以眉壽是魯參之行也孔子曰孝德之始也悌德之序也

信德之厚也忠德之正也參中夫四德者也以此稱之美功不

伐貴位不喜不侮不佚不傲無告是顯孫師之行也孔子言之

子曰其不伐則猶可能也其不弊百姓則仁也詩云愷悌君子民
之父母夫子以其仁為大學之深送迎必敬上交下接若截焉
是卜商之行也孔子說之以詩曰式夷式已無小人殆若商也
其可謂不險矣貴之不喜賤之不怒苟利于民矣庶于行已其
事上也以佑其下是澹臺滅明之行也孔子曰獨貴獨富君子
助之夫也中之矣先成其慮及事而用之故動則不妄是言偃
之行也孔子曰欲能則學欲知則問欲善則詳欲給則豫當是
而行偃也得之矣獨居思仁公言仁義其于詩也則一日三復
白圭之玷是公縉之行也孔子信其能仁以為異士自見孔子
出入於戶未嘗越禮往來過之足不履影塔蟄不殺方長不折

執親之喪未嘗見齒是高柴之行也孔子曰柴于親喪則難能
也啓蟄不殺則順人道方長不折則恕仁也成湯恭而以恕是
以日濟凡此諸子賜之所親覩者也吾子有命而訊賜賜也固
不足以知賢文子曰吾聞之也國有道則賢人興焉中人用焉
中庸之人乃百姓歸之若吾子之論既富茂矣壹諸侯之相也
焉時用也抑世未有明君所以不遇也子貢既與衛將軍文子言適魯見
孔子曰衛將軍文子問二三子之于賜不壹而三焉賜也辭不
獲命以所見者對矣未知中否謂以告孔子曰言之乎子貢以
其辭狀告孔子子聞而笑曰賜汝次焉人矣言為知人之次子貢對曰
賜也何敢知人此以賜之所覩也孔子曰然吾亦語汝耳之所

未聞目之所未見者豈思之所不至智之所未及哉子貢曰賜願得聞之孔子曰不克不忌不念舊怨蓋伯夷叔齊之行也思天而敬人服義而行信孝于父母恭于兄弟從善而不教蓋趙文子之行也其事君也不敢愛其死然亦不敢忘其身謀其身不遺其友君陳則進而用之不陳則行而退蓋隨武子之行也其為人之淵源也多聞而難誕內植足以沒其世國家有道其言足以治無道其然足以生蓋銅鞮伯華之行也外寬而內正自極于隱括之中直已而不直入汲汲於仁以善自終蓋遽伯玉之行也孝恭慈仁允德圖義約貨去怨夫利怨之所聚故約省其貨以遠去其怨輕財不匱蓋柳下惠之行也其言曰君雖不量于其身臣不可

以不忠於其君是故君擇臣而任之臣亦擇其君而事之有道順命無道衡命蓋晏平仲之行也蹈忠而行信終日言不在十之內國無道處賤不悶貧而能樂蓋老子之行也易行以俟天命居下不援其上其親觀于四方也不忘其親不盡其樂以不能則學不為已終身之憂蓋介子山之行也子貢曰敢問夫子之所知者蓋盡已于此而已乎孔子曰何謂其然亦畧舉耳目之所及而矣昔晉平公問祁奚曰羊舌大夫晉之良大夫也其行如何祁奚辭以不知公曰吾聞子少長乎其所以掩之何也祁奚對曰其少也恭而順心有耻而不使其過宿其為大夫悉善而謙其端盡善道而謙讓是其正也其為輿尉也信而好直其功言其

功直至于其為容也。溫良而好禮，博問而時出其志。公曰：曩者問子，子奚曰不知也？邾奚曰：每位以變，未知所止，是以不敢得知也。此又羊舌大夫之行也。子貢跪曰：請退而記之。

賢君第十三

哀公問於孔子曰：當今之君，孰為最賢？孔子對曰：抑有衛靈公名平。公曰：何也？孔子曰：公子渠牟，其智足以治千乘，其信足以守之；靈公愛而任之，又有士林國者，見賢必進之，無不達也不能達而退，與分其祿，足以無游放之士。靈公賢而尊之，又有士曰慶足者，國有大事則起而治之，無不濟也。國無事則退而容賢，靈公悅而敬之，又有大夫曰史鮪，以道去衛而靈公郊舍三

日琴瑟不御，必待史鮪之入而後敢入。臣以此取之，不亦可乎？
○哀公問於孔子曰：當今之君，孰為最賢？孔子對曰：丘未之見也。抑有衛靈乎？公曰：吾聞其閨門之內無別而予次之賢，何也？孔子曰：臣語其朝廷行事，不論其私家之際也。公曰：其事何如？孔子對曰：靈公弟子渠牟，其智足以治千乘，至以此取之，雖次之賢，不亦可乎？

○哀公問於孔子曰：寡人聞忘之甚者，徙而忘其妻，有諸？孔子對曰：此猶未甚者也。甚者乃忘其身。公曰：可得聞乎？孔子曰：昔者夏桀貴為天子，富有四海，忘其聖祖之道，壞其典法，廢其世祀，荒于淫樂，耽湎於酒，佞臣諂諛，窺導其心，忠士折口，杜逃罪

不言天下誅桀而有其國此謂忘其身之甚矣

○子貢問於孔子曰今之人臣孰為最賢孔子曰吾未識也往

者齊有鮑叔鄭有子皮名宰則賢者矣子貢曰然則齊無管仲

鄭無子產乎子曰賜汝聞用力為賢乎進賢為賢乎子貢曰進

賢賢哉子曰然吾聞鮑叔進管仲子皮進子產未聞二子之達

賢已之才者也

○顏淵問於孔子曰何以為也身孔子曰恭敬忠信而已矣恭

則遠于患敬則人愛之忠則和于眾信則人任之勤斯四者可

以政國豈特一身者哉○顏淵將西遊于宋問于孔子曰何以

為身至豈特一身者哉故夫不比于數也親而比于疎不亦遠乎

不脩其中而修外者不亦反乎慮不先定臨事而謀不亦晚乎

○子路問於孔子曰賢君治國所先者何子曰在于尊賢而賤

不肖子路曰由聞晉范中行氏尊賢賤不肖矣其亡何也上謂

大位也其死子曰范中行氏尊賢而不能也賤不肖而不能

去也賢者知其不巳用而怨之不肖者知其賤已而讐之一作

必已賤而讐之賢者怨之不肖者讐之怨讐並存于國鄰敵構兵于郊

中行氏雖欲無亡豈可得乎

○孔子讀詩于正月六章惕焉如懼曰彼不達之君子豈不殆

哉從上依世則道廢違上離俗則身危時不興善已獨由之則

曰非妖即妄也故賢也既不遇天恐不終其命焉桀殺龍逢紂

殺比干皆類是也詩曰謂天蓋高不敢不局謂地蓋厚不敢不
踣此正月六章之辭此言上下畏罪無所自容也

○孔子喟然嘆曰嚮使銅鞮同伯華無死天下其有定矣
子路曰由願聞其爲人也何若孔子曰其幼也敏而好學其壯
也有勇而不屈其老也有道而能下人有此三者以定天下何
難乎哉子路曰其幼也敏而好學則可其壯也有勇而不屈則
可也若夫有道下人何哉子曰由汝不知也吾聞以衆攻寡無
不克也以貴下賤無不得也昔者周公居冢宰之尊制天下之
政而猶下白屋草屋之士日見百七十人斯豈以無道也欲得士
之用也惡有有道而不下天下君子哉

○孔子聞處喟然而嘆曰嚮使銅鞮伯華至子路曰幼而好學

壯而有勇則可也若夫有道下人又誰下哉子曰由不知吾聞

云、同○魯哀公問政於孔子孔子對曰政之急者莫大乎使

民富且壽也公曰爲之柰何孔子曰省力役薄稅歛則民富矣

敦禮教遠罪戾則民壽矣公曰寡人欲行夫子之言恐吾國貧

矣孔子曰詩云愷悌君子民之父母未有其子富而父母貧者

也論語有若曰百姓足君孰與不足得夫子此意矣

○齊景公來適魯舍於公館使晏嬰迎孔子孔子至景公問政
焉孔子答曰政在節財公悅又問曰秦穆公國小處僻而霸何
也孔子曰其國雖小其志大處雖僻而政其中其舉也果其謀

也和法無私而令不愉首拔五殺爵之大夫與語三日而授之以政此取之雖王可其霸少矣景公曰善哉

○衛靈公問於孔子曰有語寡人有國家者計之于廟堂之上則政治矣何如孔子曰其可也愛人者則人愛之惡人者則人惡之知得之已者則知得之人所謂不出環堵之室而知天下者知反已之謂也○孔子見宋君君問孔子曰吾欲使長有國而列都得之國之列都皆得其道吾欲使民無惑吾欲使士竭力吾欲使日月當時吾欲使聖人自来吾欲使官府治理為之奈何孔子對曰千乘之君問丘者多矣而未有若主君之問問之悉也然主君所欲者盡可得也丘聞之隣國相親則長有國君惠臣忠

則列都得之不殺無辜無釋罪人則民不惑士益之祿則皆竭力尊天敬鬼則日月當時崇道貴德則聖人自来任賢黜否則官府治理宋君曰善哉豈不然乎寡人不佞不足以致之也孔子曰此事非難唯欲行之云耳

辨政第十四

子貢問於孔子曰昔者齊君問政於天子夫子曰政在節財魯君問政夫子曰政在論教勅也臣葉公問政夫子曰政在悅近而來遠三者之間一也而夫子應之不同然則政異端乎孔子曰各因其事也齊君為國奢乎甚榭淫乎苑圃五官妓一作樂不懈于時一旦而賜人以千乘之家者三故曰政在節財魯君有

臣三人內比周以愚其君外距諸侯之賓以蔽其明故曰政在
諭臣夫荆其地廣而都狹民有離心莫安其居故曰政在悅近
而來遠此三者所以為政殊矣詩不云乎相亂蔑資曾莫惠我
師此傷奢侈不節以為亂者也又曰匪其止共音惟王之卑此
傷姦臣蔽主以為亂者也又曰亂離斯殍矣其適歸此傷離散
以為亂者也察此三者之所欲政其同乎哉○子曰夫道不可
不貴也中行文子倍道失義以亡其國而能禮賢以活其身聖
人轉禍為福此謂是與若入將死不入得
活故曰轉禍為福
王肅曰此說倍道失義不宜說得道之意而云禮賢不與上
相次配文文子無禮賢之事中行文子得罪于晉出亡至邊

從者曰謂此齎夫者君子也故休馬待駿者文子曰吾好音
以子遺吾琴好佩子遺吾玉是以不振吾過自容于我者也
吾恐其以我求容也遂不入車人問文子之所右執而不殺
之孔子聞之曰文子倍道失義以亡其國然得之由活其身
而能禮賢以為宜以然後得也

楚王將遊荆臺司馬子祺諫王怒之令尹子西賀于殿下諫曰
今荆臺之觀不可失也王喜附子西之背曰與子共樂之矣子
西步馬十里引轡而止曰臣願言有道王肯聽之乎王曰子其
言之子西曰臣聞為人臣而忠其君者爵祿不足以賞也諛其
君者刑罰不足以誅也夫子祺者忠臣也而臣者諛臣也願王

實忠而誅諛焉。王曰：我今聽司馬之諫，是獨能禁我耳。若後世遊之何也？子西曰：禁後世易耳，大王萬歲之後，起山陵于荆臺之上，則子孫必不忍遊于祖父之墓，以為歡樂也。王曰：善。乃還。孔子聞之曰：至哉！子西之諫也。入之于千里，一作十里之上，抑之于自世之後者也。

○子貢問于孔子曰：夫子之于子產，晏子可謂至矣。敬之敢問夫子所以與猶取也之者。孔子曰：夫子產于民為惠，主于學為博，物晏子于君為忠，臣而行為敬敏，故吾皆以兄事之，而加愛敬。或開子產晏子孰優奇子云子謂子家駒曰晏子功用之臣也，不知子產子產惠人也不如管仲。

○子貢問于孔子曰：夫子之于子產，晏子可謂至矣。敢問二大

夫之所為自，夫子之所以與之者。孔子曰：云、同云前

○孔子謂宓音密通子賤曰：子治單父，音甫今山東單縣衆悅。子何施而得之也？對曰：不齊父其父，子其子，恤諸孤，而哀喪紀。孔子曰：

善。句小節也。小民附矣，猶未足也。曰：不齊也。所父事者三人，所兄事者五人，所友者十一人。孔子曰：父事三人，可以教孝矣；兄

事五人，可以教弟矣；友者十一人，可以教學效矣。一作可之一善矣友固以

一仁故中節也。中民附矣，猶未足也。曰：此地有賢子，不齊者五

人，不齊事之，而稟度焉，皆教不齊，所以治人之道。孔子嘆曰：欲

其大者，乃于此在矣。一作其天者乃于此子有矣無敬字昔堯舜應治天下，務求賢以自輔，夫賢者百福之宗也，神明之主也。惜乎不齊之所治

者小也所治者大則庶幾矣

○孔子謂宓子賤曰子治單父衆悅子何施而得之曰子語丘所以爲之者對曰不齊之治也父恤其子其子恤諸孤而哀喪

紀同前

○子貢爲信陽宰

信陽春秋秩楚地今爲州屬河南

將行辭于孔子孔子

曰勤之慎之奉天之時無奪無伐無暴無盜子貢曰賜也少事

君子豈以盜爲累哉孔子曰賜爾未之詳也夫以不肖伐賢是

謂奪也以賢伐不肖是謂伐也緩其令急其誅是謂暴也取人

之善以自爲己是謂盜也盜非竊財之謂也吾聞之曰知爲吏

者奉法以利民不知爲吏者枉法以侵民此怨之所由生也治

官莫若平臨財莫若廉廉平之守不可改也匿人之善斯謂蔽

賢揚人之惡斯謂小人內不相訓而外相謗非親睦也言人之

善若已有之言人之惡若己受之故君子無所不慎焉○子貢

爲信陽宰至孔子曰汝未之詳也夫以賢伐賢是謂之奪以不

肖伐賢是謂之伐緩令急誅是謂之暴取善自與是謂之盜盜

非竊財之謂也

云同示前

○子路治蒲三年孔子過之入其境曰善哉由也忠信以寬矣至其庭曰善哉由也明察以

入其邑曰善哉由也忠信以寬矣至其庭曰善哉由也明察以

勤矣子貢執轡而問曰夫子未見由之政而三稱其善其善可

得聞乎孔子曰吾見其政矣入其境田疇盡易草萊其辟溝洫

深治此其恭敬以信故其民盡力也入其邑墉屋完固樹木甚

茂此其忠信以寬故其民不偷也至其庭庭其清閒諸下朋命此其明察以斷故其政不擾也以此觀之雖三稱其善庸盡其

美乎子路治蒲夫子三歎其善即此段也

何孟春曰時延陵季子游于晉入其境曰嘻暴哉國乎入其

都曰嘻力屈哉國乎立其朝曰嘻亂哉國乎從者曰夫子入

晉境未久也何其名之不疑也延陵季子曰然吾入其境田

訟荒蕪而不休雜糶崇高吾是以知其國之暴也吾入其都

新室惡而故室美新墻卑而故墻高吾是以知其民力之屈

也吾立其朝君能視而不下問其臣善伐而不上諫吾是以

知其國之亂也善觀人國者知延陵季子之所以識晉者則

知吾夫子之所以取子路者矣有民社之寄者欲善其政亦

可思過半矣

○楚昭王名渡江江中有物大如斗圓而赤直觸王舟舟人取

之王恠之遍問群臣莫能識之一作莫識使使問于孔子一作王

于魯問孔子子曰此謂萍實可剖而食之吉祥也唯霸者為能獲

焉使者反王遂食之大美一作甚美子游問曰夫子何以知其然也

子曰吾昔之鄭今華州北過一作適乎陳之野今河南聞童謠曰

楚王渡江得萍實大如斗赤如日剖而食之甜如蜜此楚王之

應也吾是以知之

○齊有一足之鳥飛集于公朝舒翅而跳齊侯懼之使使聘魯

問孔子一作齊使訪孔子孔子曰此鳥名商羊水祥與也昔童兒屈
 一脚振肩而跳一作有屈其一足且謠曰天將大雨商羊起舞
 今齊有之其應至矣急告民趣速也治溝渠修隄防禱有大水為
 災頃之大霖雨水溢泛諸國傷害民人唯齊有備不敗景公曰
 聖人之言信而有徵矣

何孟春曰夫謠之後未嘗不有應者也故聖人非獨守道而
 已也睹物記事即得其應矣

六本第十五

孔子曰行已有六本焉本立然後為君子立身有義矣而孝為
 本喪紀有禮矣而哀為本戰陣有為矣而勇為本治政有理矣

而農為本居國有道矣而嗣為本太子下之本生財有時矣而力為

本置本不固無務豐末一作無務農桑親戚不悅無務外交事無終始

無務多業聞記不善無務多談一作言無務多說比牛近不說無務

備遠一作比近不遠是以反本脩道君子之道也

○孔子曰良藥苦口而利于病忠言逆耳而利于行湯武以諤

諤而昌桀紂以唯唯一作唯而亡君無爭臣父無爭子兄無爭弟

夫無爭婦士無爭友而無其過者未之有也故曰君失之臣得

之父失之子得之兄失之弟得之夫失之婦得之已夫之友得

之是以國無危亡之兆而家無悖亂之惡父子兄弟無失而交

友無絕也一本無夫無爭婦夫失之婦得之三句

○孔子曰忠臣之諫君有五義焉一曰譎諫二曰懇諫無文三節也三曰降諫四曰直諫五曰諷一作諷諫唯度主以行之吾其從諷諫乎

謹按鮪詢曰伍舉進隱語楚王浮益其茅焦解衣危論秦帝立悟諷固不可盡與直亦未易少之顧用之之術何如耳孔子曰唯度主以行之蓋欲度君之能容與否當慝直則懇直可諷降則諷降非專主于諷諫而已也

○孔子讀易至于損益喟然而嘆子夏避席問曰夫子何嘆焉孔子曰夫自損者必有益之自益者必有決之吾是以嘆也子夏曰然則學者不可以益乎子曰非句道益之謂也道彌益而

身彌損夫學者損其自多以虛受人故能成其滿博哉天道成而必變凡持滿而能久者未嘗有也昔堯居天下之位猶允恭以持之克讓以接下是故千歲而益盛迄今而愈彰夏桀昆吾自滿而無極亢意而不節斬刈黎民如草芥焉天下討之如誅匹夫是以千載而惡著迄今而不滅是非損益之徵與日中則昃月盈則食天地盈虛與時消息是以聖人不敢當盛升輿而遇三人則下二人則軼調其盈虛故能長久也子夏曰善請終身誦之○孔子讀易至未嘗有也故曰自賢者天下之善言不得聞于耳矣昔堯治天下之位至迄今而不滅觀此如行則讓長不疾先如在輿遇三人則下之遇二人則軼之調其盈虛不

令自滿所以能久也子夏曰商請志之而終身奉行焉

○孔子見齊景公公悅焉請置廩丘之邑以爲養孔子辭而不受八謂弟子曰吾聞君子賞功受賞今吾言于齊君君未之有行而賜吾邑其不知丘亦甚矣于是遂行

○孔子在齊舍于外館景公造焉賓主之辭既接而左右白曰周使適至言先王廟災景公覆問災何王之廟也孔子曰此必釐王之廟公曰何以知之孔子曰詩云皇皇上天其命不忒天之以善必報其德此逸詩也禍亦如之夫釐王變文武之制而作玄黃華麗之飾宮室崇峻輿馬奢侈而弗可振也故天殃所宜加其廟焉以是占之爲然公曰天何不殃其身而加罰其廟也孔

子曰蓋以文武故也若殃其身則文武之嗣無乃殄乎故當殃其廟以彰其過俄頃左右報曰所災者釐王廟也景公驚起再拜曰善哉聖人之智過人遠矣

○子夏三年之喪畢見于孔子子曰與之琴使之絃侃侃而樂作而曰先王制禮弗敢過也子曰君子也子貢曰閔子哀未盡夫子曰君子也子夏哀已盡又曰君子也二者殊情而俱曰君子賜也惑故問之孔子曰閔子哀未忘能斷之以禮子夏哀已盡能引之及禮雖均謂之君子不亦可乎

○孔子曰無體之禮敬也無服之喪哀也無聲之樂歡也不言而信不動而威不施而仁志夫鐘之音怒而擊之則武憂而擊

之則悲其志變者聲亦隨之故志誠感之通于金石而况人乎
○孔子見羅雀者所得皆黃口小雀夫子問之曰大雀獨不得
何也羅者曰大雀善驚而難得黃口貪食而易得黃口從大雀
則不得大雀從黃口亦不得孔子顧謂弟子曰善驚以遠害利
食而忘患自其心矣而以所從爲禍福故君子慎其所從以長
者之慮則有全身之階隨小者之顛而有危亡之敗也○子路
問于孔子曰請釋古之道而行由之意可乎子曰不可昔東夷
之子慕諸夏之禮有女而寡爲內私壻終身不嫁嫁則不嫁矣
非有貞節之義也蒼梧姚娶妻而美讓與其兄讓則讓矣然非
禮之讓矣不慎其物而悔其後何嗟及矣今汝欲舍古之道行

子之意庸知子意不以是爲非以非爲是乎後雖悔難哉○魯
子耘瓜誤斬其根魯皙怒建大杖以擊其背魯子仆地而不知
人父之有頃乃蘓欣然而起進於魯皙曰嚮也皙得罪于大人
大人用力教參得無疾乎退而就房援琴而歌欲令魯皙而聞
之知其體康也孔子聞之而怒告門弟子曰參來勿內魯皙自
以爲無罪使人請于孔子子曰汝不聞乎昔瞽瞍有子曰舜舜
之事瞽瞍欲使之未嘗不在于側索而殺之未嘗可得小樞則
待過大杖則逃走故瞽瞍不犯不父之罪而舜不失烝烝之孝
今參事父委身以待暴怒殪而不避既身死而陷父于不義其
不孝孰大焉汝非天子之民也殺天子之民其罪奚若魯皙聞

之曰參罪大矣遂造孔子而謝過○荆公子行年十五而攝荆
相事孔子聞之使人往觀其為政焉使者反曰視其朝清淨而
少事其堂上有五老焉其廊下有二十壯士焉孔子曰合二十
五之智以治天下其固免矣况荆乎

○子夏問於孔子曰顏回之為人奚若子曰回之信賢于丘曰
子貢之為人奚若子曰賜之敏賢于丘曰子路之為人奚若子
曰由之勇賢于丘曰子張之為人奚若子曰師之莊賢于丘子
夏避席而問曰然則四子何為事先生子曰居吾語汝夫回能
信而不能反反信也君子言不賜能敏而不能詘由能勇而不
能怯師能莊而不能同無四子者之有以易吾弗與也此其所

以事吾而弗貳也○孔子游于泰山見榮聲期新序以走行于

郕之野鹿裘帶素瑟瑟而歌新序作鼓孔子問曰先生所以為

樂者何也期對曰吾樂其多而至者三天生萬物唯人為貴吾

既得為人一樂也男女之別男尊女卑故人以男為貴吾既得

為男是二樂也人生有不見日月不免襁褓者吾既以行年九

十五矣是三樂也貧者士之常死者人之終處常得終當何憂

哉孔子曰善哉能自寬者也

○孔子曰回有君子之道四焉強于行義弱于受諫休于待祿

待宜慎于治身史鮪有男子之道三焉不仕而敬上不祀而敬
鬼直已而曲人魯子侍曰參昔常聞夫子三言而未之能行也

夫子見人之一善而忘其百非是夫子之易事也見人之有善若已有之是夫子之不爭也聞善必躬行之然後導之是夫子之能勞也學夫子之三言而未能行以自知終不及二子者也

二子顏回史鮪也

○曾子從孔子之齊齊景公以下卿之禮聘曾子曾

子固辭將行晏子送之曰吾聞之君子遺人以財不若善言今夫蘭本三年湛之以鹿醕既成噉之則易之匹馬非蘭之本性也所以湛者美矣願子詳其所湛者夫君子居必擇處遊必擇方仕必擇君擇君所以求仕擇方所以修道遷風移俗者嗜慾移性可不慎乎孔子聞之曰晏子之言君子執依賢者固不困依富者固不窮馬駘斬足而復行何也以其輔之者衆孔子曰

以富貴而下人何人不尊以富貴而愛人何人不親發言不逆可謂知言矣言而衆嚮之可謂知時矣是故以富而能富人者欲貧不可得也以貴而能貴人者欲賤不可得也以達而能達人者欲窮不可得也○孔子曰中人之情也有餘則侈不足則儉無禁則淫無度則逸從欲則改是故鞭朴之子不從父之教刑戮之民不從君之令此言疾之難忍急之難行也故君子不急斷不急制使飲食有量衣服有節宮室有度畜積有數車器有限所以防亂之原也夫度量不可明是中人所以由之令教令

○孔子曰巧而好度必攻

也

聖勇而好問必勝智而好謀必成以

愚者反之是以非其人告之弗聽非其地植之弗生得其人如

聚砂而兩之言立入也非其人如會擊而鼓之夫處重擅寵專事妬賢愚者之情也位高則危任重則崩可立而待

○孔子曰舟非水不行水入舟則沒君非民不治民犯上則傾是故君子不可不嚴也小人不可不整一也

○齊高庭問於孔子曰庭人名不曠隔也山不直宜作植地言不以山為隔踰山

而來不限于地而遠來也衣穰草衣而提贄持贄為禮精氣以問事君子之道願夫子告之孔子曰貞以幹之敬以輔之施仁無倦見君子則舉之

見小人則退之去汝惡心而思與之效其行修其禮千里之外

親如兄弟行不效禮不修則對門不汝通矣夫終日言不遺已之憂終日行不遺已之患唯智者能之故自修者必恐懼以除

是者何以避難者也終身為善一言則敗之可不慎乎

辯物第十六

鄭音談今山東高縣子朝魯魯人問曰少昊氏以鳥名官何也對曰吾

祖也我知之昔黃帝以雲紀官故為雲師而雲名炎帝以火共

工以木太昊以龍其義一也我高祖少昊摯之立也鳳鳥適至是以紀之于鳥故為鳥師而鳥名鳳鳥氏歷正也玄鳥氏司分

者也伯趙氏司至者也青鳥氏司啓者也丹鳥氏司閉者也祝鳩氏司徒也睢鳩氏司馬也鳴鳩氏司空也爽鳩氏司寇也鶡

鳩氏司事也五鳩鳩聚也民者也五雉為五工正利器用正度量夷民者也九扈為九龍正扈民使無淫者也自顓頊氏以來不

能紀遠乃紀于近為民師而命以民事則不能故也孔子聞之

時年二十七遂見郊子而學焉既而告人曰吾聞之天子失官學在

四夷猶信天子失官二句蓋古語

王肅曰孔子稱官學在四夷疾時之廢學也郊少昊之後以

其世則遠矣以其國則小矣魯周公之後以其世則近矣以

其國則大矣然其知禮不若郊子故孔子發此言

○叔孫氏之車士曰子鈕音商商名採薪于大野今高平鉅野縣東北

大澤在魯西獲麟焉折其前左足載以歸叔孫以為不祥棄之于郭

外使人告孔子曰有麇而角者何也孔子往觀之曰麟也胡為

來哉胡為來哉反袂拭面涕泣沾襟叔孫聞之然後取之子貢

問曰夫子何泣爾孔子曰麟之至為明王也出非其時而見害

吾是以傷焉麟者聖人之瑞夫傷馬蓋自感也

○季桓子穿井獲如王缶其中有羊焉使使問孔子曰吾穿井

于費而于井中得一狗何也孔子曰丘之所聞者羊也丘聞之

木石之怪夔蜺蝮水之怪龍罔象土之怪羗羊也

○吳伐越噓毀也會稽獲巨骨一節專車焉吳子使來聘于魯且

問之孔子命使者曰無以吾命也賓既將事乃發幣于大夫及

孔子賜大夫及孔子孔子爵之飲酒既徹俎而燕客執骨而問曰敢問骨

何如為大孔子曰丘聞之昔禹致群臣于會稽之山防風後至

禹殺而戮之其骨專車焉此為大矣客曰敢問誰守為神孔子

曰山川之靈足以紀綱天下者其守為神守山川之神諸侯社稷

為公侯但守社稷無山川之祀者為神諸侯皆屬于王客曰

防風何守孔子曰汪芒氏之君汪芒氏之君封嵎山名山者為漆姓在

虞夏商為汪芒氏于周為長翟氏今日夷人周之初及當孔子之時其名異也

有客曰人長之極幾何孔子曰焦僂氏長三尺短之至也長者

不過十數之極也

○孔子在陳陳惠公賓之于上館時有隼集陳侯之庭而死楷

木矢貫之石罅箭鏃其長尺有咫咫八寸也惠公使人持隼如孔子館

而問焉孔子曰隼之來遠矣至封諸陳古者分同姓以珍玉所以展親親也分異姓以遠方之職貢所以無忘服也故分陳以

肅慎氏貢焉君若使有司求諸故府其可得也公使人求之金

饋如之○邾隱公朝于魯子貢觀焉子貢時為魯大夫也邾子執玉高其

容仰定公受玉卑其容俯王所聘子貢曰以禮觀之二君者將有

死亡焉夫禮生死存亡之體將左右周旋進退俯仰于是乎取

之朝祀喪戎于是乎觀之今正月相朝而皆不度不得法度心以亡

矣嘉事朝聘嘉事也不體不得其體何以能久高仰驕卑俯替驕近亂替

近疾若為主其先亡乎夏五月公薨又邾子出奔孔子曰賜不

幸而言中是賜多言

○孔子在陳陳侯就之燕遊焉行路之人云魯司鐸官名災及宗

廟以告孔子子曰所及者其桓僖之廟陳侯曰何以知之子曰

廟以告孔子子曰所及者其桓僖之廟陳侯曰何以知之子曰

禮祖有功而宗有德故不毀其廟焉今桓僖之親盡矣又功德不足以存其廟而魯不毀是以天災加之三日魯使至問焉則桓僖也陳侯謂子貢曰吾乃今知聖人之可貴對曰君之知之可矣未若尊其道而行其化之善也

○陽虎既奔齊自齊奔晉適趙氏孔子聞之謂子路曰趙氏其世有亂乎子路曰權不在焉豈不為亂孔子曰非汝所知夫陽虎親富而不親仁有寵于季孫又將殺之不尅而奔求容于齊齊人囚之乃亡歸晉是齊魯二國已去其疾趙簡子好利而多信必溺其說而從其謀禍敗所終非一世可知也

○季康子問于孔子曰今周十二月夏之十月而猶有蝻何也

孔子對曰丘聞之火伏而後蟄者畢今火猶西流司歷過也季

康子曰所失者幾月也孔子曰于夏十月火既沒矣今火見再

失閏也○吳王失差將與哀公見晉侯吳子魯哀公十二年子與晉侯會于黃池

服景伯對使者曰王合諸侯則伯率侯牧以見于王伯王官侯牧方伯名

伯合諸侯則侯率子男以見于伯今諸侯會而君與寡君見晉

君則晉成爲伯也且執事以伯召諸侯而以侯終之何利之有

焉吳人乃止既而悔之遂囚景伯伯謂太宰嚭曰魯將以十月

上辛有事于上帝先王季辛而畢有事祭所以欺吳也何也世有職焉景伯

伯自襄已來之改之若其不會則祝宗將曰吳實然嚭

言于夫差歸之子貢聞之見于孔子曰子服氏之子拙于說矣

以實獲囚以詐得免孔子曰吳子為夷德可欺而不可以實是聽者之蔽非說者之拙

哀公問政第十七

哀公問政於孔子孔子對曰文武之政布在方策其人存則其政舉其人亡則其政息天道敏生地道敏樹人道敏政夫政也者猶蒲盧也待化以成故為政在于得人取人以身修身以道修道以仁仁者人也親親為大義者宜也尊賢為大尊賢之教尊賢之等禮所生也禮者政之本也是故君子不可以不修身思修身不可以不事親思事親不可以不知人思知人不可以不知天天下之達道有五其所以行之者三曰君臣也父子也

夫婦也昆弟也朋友之交也五者天下之達道也知仁勇三者天下之達德也所以行之者一也一者誠也或生而知之或學而知之或困而知之及其知之也或安而行之或利而行之或和而行之及其成功一也○哀公問政于孔子至及其成功一也公日子之言美矣至矣寡人實固不足以成之也孔子曰好學近乎智至知所以治人則能成天下國家者矣公曰政其盡此而已乎孔子曰凡為天下國家有九經至則天下畏之公曰為之柰何孔子曰齋潔盛服非禮不動所以修身也去奢去泰去驕貴而尊德所以尊賢也爵其能重其祿同其好惡所以篤親親也官盛任使所以敬大臣也忠信重祿所以勸士也時

使薄歛所以子百姓也日省月考既廩稱事所以來百工也送往迎來嘉善而矜不能所以綏遠人也繼絕世舉廢邦治亂持危朝聘以時厚往而薄來所以懷諸侯也治天下國家有九經其所以行之者一也至誠者天之至道也誠之者人之道也夫誠弗勉而中不思而得從容中道聖人之所以体定也誠之者擇善而固執之者也公曰子之教寡人備矣敢問行之所始孔子曰立愛自親始教民睦也立敬自長始教民順也教之為始而民貴有親教以敬而民貴用命民既孝于親又順以聽命諸天下無所不可公曰寡人既得聞此言也懼不能果行而後罪咎中段同中痛故不至疑

○宰我問於孔子曰吾欲聞神之名而不知其所謂敢問焉孔子

子曰人生有氣有魂有魄氣與魂非二也魂于四肢百體為氣而魄所以動作則魄也魄精氣之寓于

形者氣魂魄會謂之生氣也者神之盛也魄也者魂之盛也生

必有死形魄歸于地謂之鬼魂氣歸于天謂之神鬼之為言歸也神之為言升

也魂氣升天而亦曰歸者人稟陰陽之氣以生自无而有也死而氣散復自有而无也是亦歸之而已矣合鬼與神

而享之教之至也是故築為宮室設為宗祧春秋祭祀以別親

疏遠通教民反古復始不敢忘其所由生也尊其生必致其敬

古聖之道仁人之德教也昔者文王之祭也事死如事生思死

者而不欲生思日則必哀稱諱則如見親祀之忠也如見親之

所愛如欲色然詩云明發不寐有懷二人文王之謂也敬而致

孔子家語 卷之五 五十五

之天從而思之祭之日樂與哀半致記作之必樂已至必哀孝子之情也文王為能得之矣

○宰我問於孔子曰吾欲聞鬼神之名而不知所謂敢問焉孔子曰人生有氣有魂氣者人之盛也夫生必死死必歸土此謂鬼魂氣歸天此謂神合鬼與神而享之教之至也骨肉弊于下化謂野土其氣發揚于上者此神之著也聖人因物之精制為之極明命鬼神以為民之則而猶以是為未足也故築為宮室設為宗桃遠廟為桃春秋祭祀以別親疎教民及古復始不致忘其所由生也衆人祇自此聽且速焉教以二端一端氣與既立報以二禮禮也建設朝事燔燎羶鄉所以報魄也此教民修本反

始崇愛上下用情禮之至也君子反古復始不忘其所由生是以致其敬發其情竭力從事不敢不自盡也此之謂大教昔者文王之祭也事死如事生思死而不欲生忌日則必哀稱諱則如見親祀之忠也思之深如見親之所愛祭欲見親顏色者其唯文王與詩云明發不寐有懷二人則文王之謂與祭之明日明發不寐有懷二人敬而致之又從而思之祭之日樂與哀半嚮之必樂已至必哀祀至謂祭事以畢知親享否故哀孝子之情也文王為能得之矣

顏回第十八

魚是公問于顏回曰莊子呂氏春秋作子亦聞東野畢之善御

九章全書 家語 五卷 二十一

乎顏回對曰善則善矣雖然其馬將必佚定公不悅入謂左右
曰君子固讒人乎三日而校來謁之曰東野畢之馬佚兩驂裂
兩服入廐定公越席而起曰趨音促駕召顏回回至公曰前日寡
人問吾子吾子曰東野畢之御善則善矣然其馬將必佚不識
吾子何以知之回對曰臣以政知之昔者帝舜巧于使民而造
父巧于使馬舜不窮其民力造父不窮其馬力是以舜無佚民
造父無佚馬今東野畢之御也升車執轡御體正矣步驟馳騁
朝禮畢矣歷險致遠馬力盡矣然而猶乃求猶責也馬不已臣以
此知之公曰善誠若吾子之言也吾子之言其義大矣願少進
乎回曰臣聞之鳥窮則喙獸窮則攫人窮則詐馬窮則佚自古

及今未有窮其下而能無危者也公悅遂以告孔子孔子對曰
夫其所以爲顏回者此之類也豈足多哉○顏回問君子孔子
曰愛近仁度近智爲己不重爲人不輕君子也夫顏回問小人
孔子曰毀人之善以爲辯狡訐懷詐以爲知幸人之有過耻學
而修不能小人也

○顏回問君子至君子也夫回曰敢問其次子曰弗學而行弗
思而得小子勉之○顏回謂子路曰力猛于德而得其死者鮮
矣盍慎諸焉孔子謂顏回曰人莫不知此道之美而莫之御也
莫之爲也何居爲聞者盍曰思也夫

○叔孫武叔見于顏回武叔多稱人之過而已評論之顏回曰

固子之來辱也宜有得于回焉吾聞諸孔子曰言人之惡非所以美已言人之枉非所以正已故君子攻其惡無攻人之惡○孔子在衛昧且晨興顏回侍側聞哭者之聲甚哀子曰回汝知此何所哭乎對曰回以此哭聲非但為死者而已又有生離別者也子曰何以知之對曰回聞桓山之鳥生四子焉羽翼既成將分于四海其母悲鳴而送之哀聲有似于此謂其往而不返也回竊以音類知之孔子使人問哭者果曰父死家貧賣子以葬與之長决子曰回也善乎識音矣

○魯定公問於顏回至謂左右曰君子固有誣人也顏回退後三日牧來訴之曰東野畢之馬佚兩驂曳兩服入于廐公聞之

越席而起至今東野畢之御也升馬執轡銜體正矣云前同

顏回問於孔子曰成人之行若何子曰達于性情之理通于物類之變知幽明之故觀游氣之原若此可謂成人矣既能成人而又加以以仁義禮樂成人之行也若乃窮神知禮德之盛也

○顏回問於孔子曰臧文仲武仲孰賢孔子曰武仲賢哉顏回曰武仲世稱聖人而身不免于罪是智不足稱也武仲為季氏廢適立庶為

孟氏所譜好言兵討而挫銳于邾是智不足名也武仲于邾戰而敗績夫

文仲也然猶有不仁者三不智者三是則不及武仲也回曰可得聞乎孔子曰下展禽知下惠之賢置六關六關開名魯本無此關文仲置之以

稅行者故為不仁妾織蒲蒲席也言其為國三不仁設虛器蔡
傳曰廢六關非也為家在于貪利也子之守龜非文仲夏父弗忌躋僖公于閔縱逆祀海鳥止于
所有故曰虛器魯東門上文仲三不知武仲在齊齊將有禍不受其田以避其
令國人祠之難是智之難也夫臧文仲之智而不容于魯抑有由焉作而不
順施而不怨也夫夏書曰念茲在茲順事恕施○仲孫何忌問
于顏回曰仁者一言而必有益于仁智可得聞乎回曰一言而
有益于智莫如預一言而有益于仁莫如恕夫知其所不可由
斯知所由矣○顏回問于孔子曰小人之言有同乎君子者不
可不察也孔子曰君子以行言小人以舌言故君子為義之上
相疾也退而相愛小人于為亂之上相愛也退而相惡

○顏回問朋友之際如何孔子曰君子之于朋友也心必有非
焉而弗能謂吾不知其仁人也不忘久德不思久怨仁矣夫○
顏回謂子貢曰吾聞諸夫子身不用禮而望禮于人身不用德
而望德于人亂也夫子之言不可不思也

子路初見第十九

子路初見孔子子曰汝何好樂對曰好長劔子曰吾非此之問
也謂以子之所能而加之以學問豈可及乎子路曰學豈益哉
子曰人君而無諫臣則失正士而無教友則失聽去聲御狂馬不
釋其策操弓不反檠木受繩則直人受諫則聖此章句受學重
問孰不順成毀人惡士必近于刑君子不可以不學也子路曰

南山有竹弗採自直斬而用之達于犀革以此言之何學之有

子曰括而羽之鏃而砥礪之其入之不益深乎子路再拜曰敬

受教哉○子路初見孔子至毀仁無仕謂毀仁者必近于刑云

云前○子路將西行辭于孔子子曰贈汝以車乎車一作帛贈汝以

言乎子路對曰請以言子曰不疆不達不勞無功不忠無親不

信無復不恭失禮慎此五者可以長久矣一作謹此五者而已矣子路曰

由請終身奉之一作履終身奉之

○子路將行至由請終身奉之敢問親交取親若何言寡可行

若何長為善士而無犯若何孔子曰汝所問苞在五者中矣親

交取親其忠也言寡可行其信乎長為善士而無犯於禮也○

澹臺子羽有君子之容而行不勝其貌宰我有文雅之辭而智

不充其辯孔子曰語云相馬以輿相士以居弗可廢矣以容取

人則失之子羽但有表耳以辭取人則失之宰予子但長于言耳

何孟春曰史記載澹臺滅明狀貌甚惡欲事孔子孔子以為

材薄既已受業退而修行行不由徑非公事不見卿大夫南

游至江從子第三百人設取與去取名施乎諸侯孔子聞之

曰吾以言取人失之宰予以貌取人失之子羽據史記所載

則子羽形陋而行高所引孔子之言與此言同而意則反矣

或問孔子于二子而有取人不驗之失知人之難則固然邪

韓非子以為仲尼之智而有失實之聲今新辯濫于宰予世

子夏言 卷之十五 六十五
主之聽眩于仲尼苟悅其言因任其人則焉得無失乎非之
警世主似矣而以仲尼為真失實則非也王充書又謂孔子
相子羽而失之不審何隱匿微妙之表也相或在內或在外
或在形體或在聲氣察外者遺其內在形體者亡其聲氣甚
矣此術士之鬼談突見漢儒之陋何至此極也孔子謂失之
云者欲人知言貌之不可以取人耳論語始吾子人也聽其
言而信其行今吾子人也聽其言而觀其行蓋亦托諸身驗
者言之以教人之意論篤是與君子者乎色莊者乎此言又
誰為哉韓非王充之徒殆是癡人前不可與說夢耳魏王朝
相論曰仲尼之門童冠之群不言相形之事抑亦難據故也

古之人固有懷不副其貌行不稱其聲者是故夫子以言信
行失之于宰予以貌度性失之于子羽聖人之于聽察精矣
然猶或有所不得以此推之則彼度表捫骨指色摘理不常
中必矣若夫周之叔服漢之許負各以善相稱于前世而書
傳記其效驗之于著者不過公孫氏之二子與夫周氏之條
侯而已

○孔蔑問行已之道子曰知而弗為莫如弗知親而弗信莫如
勿親樂之方至樂而弗驕患之方至思而弗憂孔蔑曰行已也
乎子曰攻其所不能備其所不足一作補其毋以其所能疑
人毋以其所能驕人終日言無遺已之憂終日行不遺已之患

惟智者有之故恐懼所以除患也恭敬所以越難也終身為之一言敗之可不慎乎

○孔子兄子有孔蔑者與宓子賤偕仕孔子往過孔蔑而問之曰自汝之仕何得何亡對曰未有所得而所亡者三王事若龍宜為龍前學焉得習習言不得是學不得明也俸祿少饘粥不及親戚是以骨肉益踈也公事多急不得吊死問疾是朋友之道闕也其所亡者三郎謂此也孔子不悅往過子賤問如孔蔑對曰自來仕者無所亡其有所得者三始誦之今得而行之是學益明也俸祿所供被及親戚是骨肉益親也雖有公事而無以弔死問疾是朋友篤也孔子喟然謂子賤曰君子哉若人魯無

君子者則之賤焉取此

○孔子為魯司寇見季康子康子不悅當為桓子非康子也孔子又見之

宰予進曰昔予也嘗聞諸夫子曰王公不我聘則弗動今夫子

之于司寇也日少謂在官日淺而屈節數矣謂數見季孫不可以已乎孔

子曰然魯國以衆相陵以兵相暴之日久矣而有司不治則將

亂也其聘我者孰大于是哉聘我在官其為治豈復可大于此者魯人聞之曰聖

人將治何不先自遠刑罰自此之後國無爭者孔子謂宰子曰

遠去山十里蟪蛄也蟪蛄聲猶在于耳故政事莫如應之蟪蛄聲

○孔子侍坐于哀公賜之棗與黍焉哀公曰請食孔子先食黍

而後食掩左右皆掩口而笑公曰黍者所以雪也也掩非為食之也孔子對曰丘知之矣然夫黍者五穀之長郊禮宗廟以為上盛菓屬有六而掩為下祭祀不用不登郊廟丘聞之君子以賤雪貴不聞以貴雪賤今以五穀之長雪菓之下者是從上雪下臣以為妨於教害于義故不敢公曰善哉

○子貢曰陳靈公宣姪于朝靈公與嬖共淫夏姬泄治正諫而殺之是與

比干諫而死同可謂仁乎子曰比干于紂親則諸父官則少師忠報之心在于宗廟而已固必以死爭之冀身死之後紂將悔寤其本志情在于仁者也泄治于靈公位在大夫無骨肉之親懷寵不去仕于亂朝以區區之一身欲正一國之姪昏死而無

益可謂損矣詩云民之多辟無自立僻邪其泄治之謂乎○孔

子相魯齊人患其將霸欲敗其政乃選好女子八十人衣以文

飭而舞容瓊容瓊舞曲及文馬四十四駟四馬也以遺魯君陳女樂列文

馬于魯城南高門外季桓子微服往觀之再三將受馬告魯君

為周道遊觀觀之終日怠于政事子路言于孔子曰夫子可以

行矣孔子曰魯今且郊若致膳于大夫是則未廢其常吾猶可

以止也桓子既受女樂君臣淫荒三日不聽國政郊又不致膳

俎孔子遂行宿于郭屯師以送曰夫子非罪也孔子曰吾歌可

乎歌曰彼婦人之口可以出走彼婦人之請可以死敗言婦人

敗足以使人死優哉游哉聊以卒歲○孔子曰君子以其所不能

子聖人書 家語 十五卷 六十八
畏人小人以其所不能不信人故君子長人之才小人抑人而取勝焉

在厄第二十

楚昭王聘孔子孔子往拜禮焉路出于陳蔡陳蔡大夫相與謀曰孔子聖賢其所刺譏皆中諸侯之病若用于楚則陳蔡危矣今者又留陳蔡之間諸大夫所設行皆非仲尼之意今楚大國也來聘孔子孔子用于楚則陳蔡用事大夫皆危矣于是乃相與發徒兵役圍孔子于野不得行絕糧七日無道所通藜藿不糝一作從者皆病孔子愈慷慨講誦絃歌不衰乃召子路而問焉曰詩云匪兕匪虎率彼曠野吾道非乎吾奚為至于此子路

矣夫子何病哉不容然後見君子孔子欣然而笑曰有是哉顏氏之子使爾多財吾為爾宰于是使子貢至楚楚昭王興師迎孔子然後得免○楚昭王聘孔子至則陳蔡危矣遂使徒兵距孔子孔子不得行絕糧七日外無所通至吾亦使爾多財吾為

爾宰宰主財者為汝主財意志同也

○孔子遭厄於陳蔡之間絕糧七日弟子餒病孔子絃歌子路人見曰夫子之歌禮乎孔子弗應曲終而曰由來吾語汝君子好樂為無驕也小人好樂為無懼也其誰知之子不我知而從我者乎子路不悅援戚而舞三終而出及至七日孔子修樂不休子路愠見曰夫子之修樂時乎孔子不應樂終而曰由昔日

齊桓霸心生于莒齊無知其君小自出奔莒句踐霸心生于會稽晉文公不禮文霸
 心生于驪氏晉獻公聽驪姬之讒重耳出亡過衛衛文公不禮
 故又曰霸心馬及曹曹共公聞其駢脅欲觀其裸浴溥而觀之生于曹衛
 故若不幽則思不遠身不約則智不廣庸知而不
 遇之于是與明日免于厄子貢執轡曰二三子從夫子而遭此
 難也其弗可忘矣孔子曰惡是何言也語不云乎三折肱而成
 良醫夫陳蔡之間丘之幸也二三子從丘者皆幸人也吾聞之
 人君不困不成王烈士不困不成行昔者湯困于夏臺文王困
 于羑里今河內湯陰縣有羑里城秦穆公困于殽左傳晉及姜戎敗秦師于殽
 齊桓困于長勺魯莊公敗齊師于長勺句踐困于會稽晉文困于驪氏
 夫困之為道從寒之及煖煖之及寒也唯賢者獨知而難言也

易曰困亨貞大人吉無咎有言不信聖人所與人難信也陳蔡
 之間吾與二三子庸知其非激憤厲志之始于是乎

○孔子厄于陳蔡從者七日不食子貢以所齋貨竊犯園而出
 告糴于野人得米一石焉顏回仲由炊之于壞屋之下有埃墨
 墮飯中顏回取而食之子貢自井望見之不悅以為竊食也又
 問孔子曰仁人廉士窮改節乎孔子曰改節即何稱于仁廉哉
 子貢曰若回也其不改節乎子曰然子貢以所飯告孔子子曰
 吾信回之為仁久矣雖汝有云弗以疑也其或者必有故乎汝
 止吾將問之召顏回曰疇昔予夢見先人豈或啓祐我哉子炊
 而進飯吾將祭焉對曰向有埃墨墮飯中欲置之則不潔欲棄

之則可惜，卽食之不可祭也。孔子曰：然乎？吾亦食之。顏回出，孔子顧謂二三子曰：吾之信回也，非待今日也。二三子由此乃服之。○孔子遭厄于陳蔡之間，至其弗忘矣。孔子曰：惡何也？猶言是向也。夫陳蔡之間，丘之幸也。二三子從丘者，皆幸也。吾聞之，君不困不成，王列士不困行不彰，庸知其非激憤厲志之始。于是乎在。

入官第二十一

子張問入官於孔子，子曰：安身取譽爲難。子張曰：爲之如何？子曰：已有善，勿專；教不能，勿怠；已過，勿發；失言，勿掎；掎，不不善，勿遂；行事，勿留。君子入官，有此六者，則身安譽至而政從矣。且夫忿

數者，獄之所由生也；距諫者，慮之所以塞也；慢易者，禮之所以失也；怠惰者，時之所以後也；奢侈者，財之所以不足也；專獨者，事之所以不成也。君子入官，除此六者，則身安譽至而政從矣。故君子南面臨官而公治之，精智而畧行之，進是利而除是害，無求其報焉。是故臨官不治則亂，亂生則爭之者至，明君必寬宥，一作裕以容其民，慈愛以優柔之，而民自得矣。君上者，民之儀也。有司執政者，民之表也。邇臣便辟者，群僕之倫也。故儀不正則民失表，不正則百姓亂。邇臣便辟則群臣污矣。古者聖王冕而前旒，所以蔽明也；統絃充耳，所以掩聰也。水至清則無魚，人至察則無徒。枉而直之，使自得之；優而柔之，使自求之；揆而度

之使自索之民有小罪必求其善以赦其過民有大罪以原其故以仁輔化如有死罪其使之生則善也是以上下親而不離道化流而不蘊此治民之至道矣入官之大統矣子張既聞斯言退而記之

○子張問入官

當官治民之職於孔子

至故君子南面臨官大域之中

大域猶

而公治之精智而畧行之合是忠信考是大倫存是美

惡進是利而除是害無求其報焉而民之情可得也夫臨之無

抗民之惡勝之無犯民之言量之無伎

猶周也

民之詞度量而施

也養之無優于其時愛之無寬于刑法若此則身安譽至而民

得也君子以臨官所見則邇故明不可蔽也

所見邇謂察于微也

所求于

邇故不勞而得也所以治者約故不用衆而譽立凡法象在內故法不遠而源泉不竭是以天下積而本不寡短長得其量入志治而不亂政德貫乎心藏乎志形乎色發乎聲若此而身安譽至民咸自治矣是故臨官不治則亂亂生則爭之者至爭之至又大亂明君必寬裕以容其民慈愛優柔之而民自得矣行者政之始也說者情之導也善政行易簡而民不怨言調說和則民不變法在身則民象明在已則民顯之若乃供已而不節則財利之生者微矣貪以不得則善政必簡矣苟以亂之則善言必不聽也詳以納之則規諫日至言之善者在所日聞行之善者在所能為故君子者民之儀也有司執政者民之表也邇

臣便僻者群僕之倫也。僻宜為群倫紀也為眾之紀故儀不正則民失表不端則百姓亂。邇臣便僻則群臣汗矣。是以人主不可不敬乎三倫。君子修身及道，察里言而服之，則身安譽至。終始在焉。故夫女子必自擇絲麻，良工必自擇貌材，賢君必自擇左右。勞於取人，佚于治事。君子欲譽則必謹其左右，為上者譬如緣木馬，務高而畏下，滋甚六馬之乖離。必于四達之交衢，萬民之叛道，必于君上之失政。上者尊嚴而危民者卑賤而神愛之，則有惡之則亡，長民者必明此之要。故南面臨官，貴而不驕，富而能供，有本而能圖，未修事而能建業，久居而不滯，情近而暢，乎遠察一物而貫乎多，治一物而萬物不能亂者，以身本者也。君子蒞民

不可以不知民之性，而達諸民之情。既知其性，又習其情，然後民乃從命矣。故世舉則民親之，政均則民無怨。故君子蒞民，不臨以高，不導以遠，不責民之所不為，不強民之所不能。以明王之功，不因其情，則民嚴而不迎，篤之以累年之業，不因其力，則民引而不從。若責民所不為，強民所不能，則民疾。七則僻矣。古者聖主冕而前旒，所以蔽明也。紘統充耳，所以掩聰也。水至清則無魚，人至察則無徒。枉而直之，使自得之，優而柔之，使自求之，揆而度之，使自索之。民有小罪，必求其善，以赦其過。民有大罪，必原其故，以仁輔化。如有死罪，其使之生，則善也。是以上下親而不離，道化流而不蘊。故德者政之始也，政不和則民不從。

其教矣不從教則民不習不習則不可得而使也君子欲言之見信也莫善乎先虛其內欲政之速行也莫善乎以身死之欲民之速服也莫善乎以道御之故雖服必強自非忠信則無可以取親于百姓者矣內外不相應則無取信于庶民者矣此治民之至道矣入官之大統矣子張既聞孔子斯言遂退而記之○子路問於孔子曰君子亦有憂乎子曰無也君子之修行也其未得之則樂其意既已得之又樂其治是以君子有終身之樂無一日之憂小人則不然其未得也患弗得之既已得之又恐失之是以有終身之憂無一日之樂也

○曾子敝衣而耕于魯君聞之而致邑焉曾子固辭不受使也言其隔而不此其所以息也矣子貢曰大哉乎死也君子息焉小人休焉大哉乎死也

○子路問于孔子曰有人于此夙興夜寐耕耘樹藝手足胼胝以養其親然而名不稱孝何也孔子曰意者身不敬與辭不順與色不悅與古之人有言曰衣與繆與曾不爾聊今夙興夜寐耕耘樹藝手足胼胝盡力以養其親無此三者則何以為而無孝之名也由居吾語汝雖有國士之力不能自舉其身非無力也勢不便也故入而行不修身之罪也出而名不章友之過也故君子入則篤行出則友贊何為而無孝之名也○子路問於孔子曰有人於此至古之人有言曰人與已與不汝欺今盡力

養親而無三者之闕何為無孝之名乎孔子曰由汝志之吾語
 汝雖有國士之力而不能自舉其身非力之少勢不可矣夫內
 行不修身之罪也行修而名不彰友之罪也行修而名自立故
 君子入則篤行出則交賢何謂無孝名乎○孔子自衛入晉哀公
 五至河聞趙簡子殺竇犢姓犢犢之字及犢華一作慶華乃臨河而
 歎曰美哉水洋洋乎丘之不濟於此命也天子貢趨而進曰敢
 問何謂也孔子曰竇犢鳴犢犢華晉國之賢大夫也趙簡子未
 得志之時須此兩人一作二人而後從政及其得志而殺之乃從政
 丘聞之割胎殺夭則麒麟不至其郊竭澤而漁則蛟龍不處其
 淵覆巢破卵則鳳凰不翔其邑何則謹傷其類也夫鳥獸之於

不義也尚知避之况於人乎哉遂還息於陬鄉此鄉非魯之陬作槃操

琴曲名以哀之○孔子自衛將入晉至君子違去傷其類者也至

還息於鄒作槃操琴曲名以哀之○孔子之宋匡人簡子以甲士

圍之子路怒奮戟將與之戰孔子止之曰惡音烏有修仁義而不

免世俗之惡去聲者乎夫詩書之不講禮樂之不習是丘之過也

若以述先王好古法而為咎者則非丘之罪也命也夫由歌予

和汝子路彈琴而歌孔子和之曲三終匡人解甲而罷

何孟春曰史記云孔子使從者為甯武子臣於衛然後得去

致堂胡氏曰穆公末年武子之子相已與孫良夫將兵侵齊

武子非老則卒矣穆公卒歷定公獻公凡三十七年至靈公

三十八年而孔子生使有兩武子則可若猶愈也其年當百有五六十年矣何子長之踈也

○孔子適鄭與弟子相失獨立東郭門外或人謂子貢曰東門外有一人焉其長九尺有六寸河目上下匡隆顙頰其頭似堯其頸似臯繇其肩似子產然自腰已下不及禹者三寸纍然不如喪家之狗子貢以告孔子欣然而歎曰形狀末也如喪家之狗然乎哉然乎哉

○孔子適衛路出于蒲會公叔氏以蒲叛衛而止之孔子弟子有公良儒者為人賢長有勇力以私車五乘從夫子行喟然曰昔吾從夫子遇難于匡又伐樹于宋今遇困于此命也夫與共

見夫子仍與於難寧我闔死挺劍而合眾將與之戰蒲人懼曰苟無適衛吾則出子以盟孔子而出之東門孔子遂適衛子貢曰盟可負乎孔子曰要我以盟非義也衛侯聞孔子之來喜而於郊迎之問伐蒲對曰可哉公曰吾大夫以為蒲者衛之所以恃晉楚也伐之無乃不可乎孔子曰其男子有死之志公叔氏他國故男子欲死之不樂適也吾之所伐者不過四五人矣本與叔孫公曰善卒不果伐他日靈公又與夫子語見飛鴈過而仰視之色不悅孔子乃逝也

○孔子曰不觀於高崖何以知顛墜之患不臨於深淵何以知汝溺之患不觀於巨海何以知風波之患失之者其不在此乎

士慎此三者則無累于身矣。○子貢問于孔子曰：賜既為人下矣，而未知爲人下之道，敢問之。子曰：爲人下者，其猶土乎？汨也。之之深，則出泉；樹其壤，則百穀滋焉；草木植焉，禽獸育焉；生則出焉，死則入焉，多其功而不意，弘其志而無不容，爲人下者以此也。○衛蘧伯玉賢而靈公不用，彌子瑕不肖，反任之。史魚患之，數以諫，靈公而不從。史魚病將卒，命其子曰：我卽死，治喪于北堂。吾在衛朝，不能進蘧伯玉而退彌子瑕，是吾爲臣不能正其君也。生而不能正其君，則死無以成禮。我死，汝置屍牖下，於我畢矣。其子從之。靈公吊焉，怪而問焉。其子以其父言告公。慄然失容曰：是寡人之過也。於是命之殯于客位，進蘧伯玉而

用之，退彌子瑕而遠之。孔子聞之曰：古之諫者，死則已矣，未有如史魚死而屍諫，忠感其君者，也可不謂直乎？

